

橫塘集

許景衡



欽定四庫全書

橫塘集卷一

宋 許景衡 撰

五言古詩

題海山亭懷左經臣詩

去年登斯亭江山照尊俎眼中十年舊一笑便爾汝今
年登斯亭春風糝花絮故人渺天末雲海滯鱗羽尺素
相濡沫耿耿不我與壁間指舊題珠玉暗塵土良辰豈
易得陳迹空處所眷言繼高韻寸縷慚織組嘉我二三

子肴核佐玉醕歡然為傾倒落日爭起舞丈夫貴適意
窮達付出處洛陽真小兒顧慕涕如雨江流無日夜而
此獨不去何須數歲月俯仰亦今古

食筍

山中春物早霏紅亂桃杏霜筠固自如挺立萬夫整整蟄
雷走狂鞭迸地驚脫穎鮮華競時節露籜含朝景山家
窘口腹擷摘盡畦町林間忽斑斑一笑脫愁境呼兒且
朝飯縹緲度雲嶺海犀紛縱橫荆玉燦光烟土生得所
適藜藿厚五鼎膏粱誰不飽去去多僥倖

康師見訪於竹閣因師臣師同賦問訊元老人

道人樂巖栖泉石厭眼耳胡為一葉舟汎汎西湖水應
憐老居士巾屨困塵滓相從一笑頃茗盃浮雲蘂江天
正搖落秋色淡如洗宴坐俯層軒梢雲森鳳尾眷言東
溪老挺立萬夫偉平生海潮音卷舌付諸子維此岑邃
師道學究終始當年幾酬對萬法一彈指要當出新句
特用問興止江河有餘潤今我亦隨喜

贈袁州仰山簡長老

簡師本吾儒學佛見聞奧開心滌塵滓回首棄巾帽飄
飄秋雲意凜凜霜柏操魚鼓屢陪衆林壑常寄傲十年
棲仰山終日勤勸導欲酌清泠泉為爾沃炎燥欲揮智
慧劍戒爾逞貪暴迷途自多梗法岸豈易到惟知務引
拔仰不愧覆幬幽明雖難詰善否疑有報巖間湧寶塔
茲事誰為造琢削寧須班挽拽誰困鼻一方競奔走萬
口盡喧噪守臣獻異狀天子錫嘉號鎮壓等衡嶽扶持

壯大寶師乎良有得叟也無復道

鄉會詩錢晉臣和韻謝之

流落湖海間十載苦卑濕生還亦何事猶未掃餘習天
葩發新句珠履追舊集和篇紛四來文采各煒燭轟鏗
金石動淒楚風雨急土風自難忘豈類南冠繫英英王
者後文武盛爵邑清深如古井短綆未易汲如何示同
好醉墨猶我及年來窮到底屋壁徒四立此行亦何幸
珠玉得屢挹騏驎委六轡萬里無險澀他年來高車

何人猶戴笠

登清勝堂呈長兄

幽居在山腰斯堂近山頂松竹瑣陰翳軒窗闕光炯先
生為題榜醉墨重九鼎登臨屬秋半搖落江山迴獨鳥
點晴空斜陽亂帆影相將舉網去鳴榔盡漁艇含情寓毫
端羞澁對清景却憶初來時積雪照高嶺餘香舞寒梅
芳意萌野杏英英座中客玉樹凌風竝天涯歎淪落誰
使脫陷穽愴然撫陳迹曉夢驚初醒年來飽經事百念
欲灰冷君恩等山嶽此意猶耿耿何當伸報效萬一免
罪青杖屨時往來壺觴欲酩酊樊籠戢鴻鵠末俗多蛙
黽此心端不謬餘生亦何幸俱恐主人瞋塵沙汗異境

朱君文拉遊淨明寺因述張宰詩

火雲湧晴空轟轟盡竒巘午汗麾白雨俯仰無從遁招
提據高岡萬木森偃蹇涼飈落冰雪爽籟發絲管朱侯真
好事十里過南坂憐我墮深甑相將振餘喘欄干俯屈
曲巾屨容跣袒風苗翠浪翻海嶼青螺遠况茲接尊酒

笑語傾懷悃浮雲識醉歌彩羽驚檀板新涼知幾日已
覺秋風轉事業愧初心明時羞冗散主人勤使事睽濶
心不展雙鳧歸未歸紅日林稍晚

還自南邑潮過不及渡因夜江上書所見

漫刺辭主人遲遲駕短轅郭外人煙晚鷄犬自吠喧客
事足俯仰世塗多險艱行役亦云勞未抵浪拘纏朝夕
真無情歛去如絕絃解衣試槃礴旅鴈方聯翩天末線
縷動鉦鼓俄聞聞稍看黃金盤吞洪濤間欬然洲渚

失浩蕩連雲天平生喜江海豈但眼界寬飄流二十載
齷齪百憂煎今夕復何夕玉壺俯人寰造物雖汝厄寧
不略汝憐清風一帆去鼓施餘高眠佳處良在茲疇昔
勞永嘆

成正仲水鄉秋興寄王履道惠然見示以此謝之

九河赴滄溟奔放日洶洶霖霖作秋潦散漫失邱壠孤
城臨絕島狂瀾驚四擁鳧鷖散凌亂蛟鱓似矜寵微茫
天勢平蕩搖坤軸動田家栽一麥秋稼泥沙壅何能憂

辛歲迫此朝夕恐孤生寄卑濕五斗安闡草飽聞達人
觀未作窮途慟稍令裨危堤運土紛接踵河伯聊戲劇
爾輩嗟倥傯成侯北方秀筆力千鈞重新詩試模寫氣
奮洪濤湧英英幕下卽伉伉山西種何當一交鋒我亦
願助勇

龍華馬舖懷盧行之去年邂逅

去年南邑歸春風拂征轡相從一笑頃花卉方斌媚歲
月俯仰間還到經行地壁間舊詩句塵土日蒙閱老境
牽俗累節物搖鄉思歸歎悵何時與子同此味浮雲有
南北况乃為祿仕置之勿復論一醉了春事

道樂安寄楊縣丞時可

猗蘭出衆草歲晚不可採幽幽澗底松獨立色不改成
都有雲昆達識我所駭形骸判土木軒冕那能免端懷
三釜養尚贊百里宰人方笑渠醜我獨悲衆賸經行閭
闔里指迷紛穉艾愛之不可見暮色生寒靄一區已有
宅三徑可無待他年歸去來垂白看戲綵林園日成趣

雞犬亦自在回看是非場
蠻觸誰勝敗收身要閑健
肯坐老病悔我亦釣橫塘
相望渺雲海

寄左四十

小左真竒才童穉已穎悟
讀書一十年曾臆日充軀
時吐所有落筆不肯住
長江吞巨壑白日破昏露
雄辭何縱橫妙理爭發露
驂騑始汗血萬里猶頃步
嗟嗟駕駘輩安用苦猜妬
而我何為者江海久飄寓
得子稠人中磊落真瑜璐
文章豈易工識者尤難遇
哀絃有三嘆

要非俗所論往還幾歲月
會面輒忘去蕭條抱膝吟
浩蕩登高賦迷途子所憐
正我欲到處我觀古人文
何曾事章句至音本澹泊
大美異九具君看桃李花
紛紛競春莫終言適衆口
了不在紅素子兮更深探
吾言亦其粗

寄左與言

時與家府君遊天台

我公厭紛華早歲謝羈束
卜居山水間山水長在目
巉嶮吹臺高澗澗橫塘淥
興來即杖屨往往混樵牧
別來

二三載猿鶴悵幽獨歸心日搖搖
夢繞湖山曲兒曹真罪人志養非
所欲留連州縣間折腰食斗粟世途
苦多礙公心亦煩感春言慰公者蕭
蕭散惟林麓謝屐齒已蠟陶中酒初
漉結束山家具提携倩童僕遙知入
山去野飯久不肉相見石橋側觸眼
驚寒瀑殷勤清淨供煮茗媚乾竺殘
底亦薄相聊以眩聾俗桃谿仙洞府
流水花翻翻二子去已久蟠桃知幾
熟弔古一概然新詩定相屬英英太
冲後壑壑崑山玉千言揮灑頃紙上
龍蛇伏聯鑣得所適山路忘重複我
亦箇中人簿領方驅逐遙望白雲飛
此心尤躑躅羨子好心事愧我祇眠
餓人生行樂耳險澀戒川陸千金不
垂堂萬里虞脫軸歡罷念歸旋無貪
華頂宿

引泉示吳甥

淙淙玉溪泉曲折西亭隅飛流自噴
薄白石淨如鋪雖無滌井禽亦有針
頭魚豈知江河寬噓沫自相濡况此
五六月萬物在洪鑪而我弄清淺瑣
碎珠玉俱泉兮且

金定四庫全書 卷一
勿流止此為我娛一出澗谷去人間供百需清者鑒鬚
眉濁者混泥塗江湖尚或爾而况溝與渠寄語山中人
所養當何如

浮屠二首

浮屠有冲衍少小已雋偉身雖束異教性實嗜書史千
言揮灑頃妙語如翻水嗟嗟靜閣中斯人今已矣
成象有至行既冠逃浮圖與遊何其多一一士大夫毛
髮不及翦破衲常如如軒楹已陳迹來者猶嗟吁

小圓石屏

微風激寒波浩浩皺紋縠連山夾脩徑約略露寒木何
人琢山骨拂拭温如玉蒼蒼碧月樣入手不盈掬此生
隨萬物何者斯為足要須指顧間一寄千里目

石屏

嗟我官永寧天台祇兼驛如何三過鴈未省一投屐豈
無謫仙夢蕭散到泉石亦有山中詩淋漓堆醉墨當時
巧酬唱二左名藉藉戴子爾何為十載名山客自言石

金定四庫全書
卷一
橋下醉耳驚霹靂石橋富子孫一一架珪壁希微小江
山妙盡丹青蹟憐我逸少徒念念岷峨適時此一拳許
已作千峯碧我生癡鈍殺兩眼眩白黑塵埃浪奔走簿
領隨戲劇何階探道要回首謝形後琴書載扁舟歸卧
橫塘側天台何必到去路繞荆棘端留石屏風種種自
可識

張仲共許惠呂研因成長句

英雄舊割據鼎業逐流水高臺亦已傾况及分香婢鱗

鱗屋上瓦棄擲滿隣里鑄窪漫兒戲後世始稱美世人
攻翰墨好古惟兩耳何曾問珉玉枉却金金市豈知疊
口翁十指老泥滓追蹤千載後未易較彼此其質堅而
剛其膚膩而理澄泓秋水淨慘淡暮山紫要當奴鳳味
何友龍尾神工付黃壤人間能有幾張侯金閨彥不特
河朔偉十年走澤潞百物盡糠粃惟有篋中珍左右配
書史明光惟起草此獨塵埃裏嗟我方著書瓦礫著獺
髓慙慙桂籍舊許較陶泓子學問已遺俗取舍期不詭

及物何所望姦諛誅既死

南監還宅

野店飯童僕駐馬亦俄頃寒日不相貸漸漸歎西嶺揮
鞭上馬去驚塵蒙四境客衣已踈薄霜風作淒冷極目
去路長回首烟村暝鳥雀飛棲定雞犬啾喧靜新月當
馬頭踈林亂人影去去甘遠役遲遲復深省筋力疲往
來歲月磨簿領雖云竊廩祿乃是蹈機穽戰粟當吏案
低回傍公屏少年浪自重事業期台鼎棲棲裁一命泛
泛慙飄梗窮通宜有在賦予定誰秉矢詩寄幽嘆寂寞
寒夜永

庚子歲作

我本山中人中年墮紛華祠庭罷香火還尋舊生涯墟
曲分耆舊問勞仍咨嗟三徑日荒蕪歸來何晚耶亦既
謝父老低頭自吟哦人生各有役倦游即還家來者祇
如許往者知奈何

憶昨

金定四庫全書
卷一
憶昨秋風時持檄走東越棘園瑣深嚴蓮塘漾空闊嘉
與二三子雄辯探理窟清尊日從容高堂俯軒豁思家
資善謔望遠嚴詩律海蚌剖明珠荆璞略玷缺雙瞳眩
丹青萬紙疊冰雪敢辭窮日力要使駑驥別誰憐今夜
裏還對中秋月當時席空堦清影數毛髮杯盤已零亂
浩歌彌激烈朋從渺湖海歲月苦飄忽窮閭撫往事驚
夢誰與說清砧送逸響寒蟬共幽咽舊遊知誰在想見
賓筵設冷然廣寒宮共此白銀闕題雲滿四壁世路非
一轍北軒風雨多長恐銀鈎脫

白沙驛弔辛氏

劍溪激流湍狼石森戈及劍山皆壁立小徑千盤紆行
人雖慎擇何者為夷塗我行岳灘上短亭臨路隅詩榜
紛四壁共傷辛氏妹辛公罷會稽歸舟挈妻孥驚濤觸
巨石十掌一息殂唯公倚敝篷脫命顛沛餘泥沙汙玉
質波瀾漾羅襦草木為慘淡鷗鳧亦驚呼嬌魂逐流水
散漫何所如遺骸不盡獲亦有葬江魚千金不垂堂覆

輒戒後車爾死今四紀曾無復淪胥是身等浮雲變滅
只斯須在物苟有益寧辭死非辜沉江耻讒國人皆笑
三閭殺身以成仁聖言良不誣溺死豈爾志庸知非良
圖紛殖已利感歎獨躊躇

和時可耐二首

聖賢須千鍾我豈箇中人焦枯展餘瀝好我已十分元
戎鎮河朔憐此賤與貧不羨彼瀛州已有玉膏醇小槽
滴真珠霑餉無踈親但有坐上客誰問甌中塵豈學梁

父吟何時見陽春

勞生何擾擾百年今半途是身等浮雲南北方自如青
衫憶初仕與公父子俱邂逅話疇昔恍恍一夢餘

潛清室

世途溷塵土道人獨潛清隱几方丈間凜然玉壺冰湖
山自拱揖風月時將迎未能役濟勝久客媿吾纓

書聽雨亭呈元老

無雨我掩耳有雨我不聞我豈忘人耶心手自紛紜老

人登斯亭聽否了不分前山忽震雷後山堆白雲

別毛德修

張公鎮闕南賓客多雋偉芝蘭已秀發父子作知己聖
人樂育才充庭皆濟濟仲也與計偕發軔已千里毛侯
東南特清澈分激水並驅及春風睽壁驚都市麟鳳豈
無種貂蟬能有幾承家貴勲業可獨在書史自憐坐櫛
散所學慙篋止永懷勝已遊塵土濯清泚相從苦匆促
寫別亦狂斐離庭寒日暮斷塵沙起

欽定四庫全書

橫塘集卷二

宋 許景衡 撰

五言古詩

贈人

山陽隱君子少有高世名終身慕父母事之如平生青
衫老一命儒宮談六經經行必造門懷如遇公卿虛往
而實返授業多豪英衣冠塵土闇辯論江河傾吟哦千
萬篇迴與六藝并鮑謝寒蟬噪郊島蒼蠅聲先生兼衆

體渾然獨天成

贈朱深明

十年走南北委跡甘蠹蠹舊學已茫然踈慵長自哂豈
知江漢旁名士有標準高名久傾屬王事得親近可是
臭味同一笑脫畦畛華堂照犀玉覺我蝸舍窘風流跂
前輩要當攄妙蘊胡為飯藜藿默坐師粲忍微生糜簿
領與俗益子盾蹉跎谷口志慚愧鹿門隱百念已灰冷
積習掃未盡緒餘君勿靳迷途須汲引

次韻江民表寄王聖時六首

先生脫塵屣酉室八十年物態日紛紜此境長湛然問
道滿函丈孰云無世緣茫茫天地間所樂乃一廛燕坐
亦何為栢子炷爐煙

前輩不可見吾猶及此老洒然忘鄙吝豈復嘆枯槁微
言破聾瞽從之恨不早况有樗櫟年庶幾松栢操先生
為首肯人人有吾道

我亦斯人徒鳥獸可同群隱居豈我意襁褓老海門物

理有悟會明鏡無塵痕似聞釣臺老勸飽千里尊豈為
飲啜興端念父子親

諫省坐何事南遷臨嶺嶠天命已在我誰能賦鵬鳥第
懷平生友坐隔湖海杳生還桐水上尺素寓襟抱鷄黍
儻可期千載有同調

居士不溷俗已判此生閒釣臺經世志諤諤在朝端出
處固不同相對即歡顏乖違限南北奮迅無羽翰此心
日相見未應勞永嘆

天地吾一氣萬物吾一身紛紛枯一體未學蔽多聞二
老獨超然早以德為鄰昭昭此心理千古無故新寄聲
發妙蘊一視世間人

次韻王經國

人生皆有役我亦事川塗崎嶇蕩兀中此境常晏如永
懷賢令尹出處與道俱起予亦多矣詩句乃其餘

次韻鄭希仲

周詩三百篇強半出憤激少陵嗣直作千載無匹敵嗟

我亦何為苦心等蓮葯平時一千首棄擲隨瓦礫朝濟不成雨安用橫天霓吾僚一何妙筆下飛霹靂青天與白日奴隸皆知覲况是箇中人固應厭飢怒八幕盛紅蓮不才慚散櫟勉哉攄婉畫稚弱安紡績

次韻姚伯遇

從事慚非才日覺有不如丐閒得祠館回首謝榮途古來陋巷人飲水樂有餘利市與名節二者常難俱

無題

功名等戲劇俗眼自驚詫詩酒有真味多應知者寡嘗聞歐陽子風月本無價今我貧到骨懸磬比居舍就使錢直在我己不暇故知造化意特用相慰藉

李伯時畫陶淵明其猶子遺余作此謝之

斯人今何在古冢號寒木簡編漫遺言風采不可復龍眠真偉人千載識高躅神交入心匠醉墨爛盈幅蕭然出塵意豈獨舊眉目仲容還好事收拾珍筭櫝世人渾未見惠然投我欲乘田元不耻折腰亦何辱行藏固有

在今昔豈余獨新詩第甲乙三徑森松菊少陵曾未知
浪疑公避俗我生癡鈍殺野性等麋鹿長恐探道淺輕
比抵鵲玉人生適意耳何苦自羈束低頭拜公像塵土
方碌碌

過新息

新息臨通衢赤白分棟宇古息眇村墟相望十里許我
行屬馳驛枉道不可去弔古獨踟躕指以示田父傷哉
彼美人國破為人虜驚魂慄風葉暗泣泣花露一死重
太山亦或輕一羽猶能子元辯獨爾悄無語舊屋空頽
垣草木日繁蕪悠悠清水千古亦東注

東郊

東郊過新雨野色何氤氳嘉苗起萎病萬頃堆寒雲田
父揖行客苦訴村墟貧年年夏旱時赤地流黃塵小兒
困鋤耘烈日背欲皺大兒斡水車手足無完筋官租且
不供矧欲養吾身東隣久無烟幾口能生存西隣逐熟
去今作何鄉人行客謝老農難難困勞塵而今新官家

寬大布深仁大臣亦端良乘時轉鴻鈞汝豈不自覺新
歲雨澤勻血區日寧靖百物方訢訢爾曹死亦足及為
太平民

次韻酬胡元賓

天地一逆旅此行適同塗等是驅馳人何者不為如一
念有忻厭慊然顧羸餘安得如吾子不與世俗俱

和楊時可贈吳子厚

吳子守西河疆敵能遠遁功名豈不偉事親有遺恨雲

孫亦何為搃髮能自奮論兵得家法絕域屢得雋三釜
乃吾志九遷何足論一朝棄官去悍卒亦驚歎官長欲
挽留歸塗已強半皇天照忠孝爵祿亦如願彼師乃曾
子棄等仇怨子從何人遊卓爾有獨見父子今一處甘
旨應手辦垂垂對黃髮衍衍日歡宴客來為從容觴豆無
早晏古今入商略亦有一笑粲人皆贈渠詩素壁供揮
翰吾丞豈真聾尚缺比一段君親恩彌重報効不可緩
始終能自勉高義薄雲漢

冬至日雪

烈風鼓青冥陰雲布崢嶸不待珠霰集忽驚玉花傾一
陽動黃宮萬物如有萌豐年頌上瑞我獨欣發生永夜
不能寐耿耿書窻明

仲煥雪中見過因留小酌

陽復目雖長歲暮氣猶慘馬曹縻管庫兀坐長戰領豈
無紅鑪炭欲取終不敢亦有兵厨酒隻指弗容染蹉跎
為祿仕黽勉從吏檢晨趨析毫分暮色俄黯黯天公復

衍巧六出紛如慘自慚非安道誰肯泛清剡慙懃絳帳
客竹輿甘頓撼可是乘輿來正坐憐壩坎駝褐點白玉
烏帽從風颭長衢得迴駕寒光照肝膽濕薪噓白煙孤
燈裊紅燄荒齋聊一笑俗境洗瑕厲江梅馮春意粉面
誰粧點踈影落清尊勸人傾漱灑念君齊魯秀文字垂
琬琰俛首江漢間為人作模範府中多豪雋淶水浮菡
萏珍烹窮水陸何獨嗜昌歎仁聖今在御威柄方親攬
君看盈尺瑞端自天心感太平容冗散萬一逃汰貶追

隨有餘日相與樂閑淡人生隨所遇何者為夷險要當
反自味豈特嘗橄欖

去年冬至過閩清再至有感

憶昨初寓宿黃宮萌一陽今我復來思節物老春光濃
陰付梅杏青實久已嘗翳翳軒窓日幾線如許長蜂兒
飽儲蜜燕子已巢梁吏役祇擾擾何術補民瘡學古要
施設及時當自強光陰俯仰過老矣徒慨慷挺挺彼蒼
官生來傲冰霜端然閱榮謝未覺月忙

七言古詩

和王魯公掌中大華

五嶽獨說太華雄屹嶻千仞撐青穹何人收卷入掌握
要使肉眼驚神通懸巖絕壑濺飛瀑玉牕翠壁開深宮
先生捧玩豈徒爾崇卑真妄歸圓融我生江海曾未識
幽邃崎嶇煩指蹤堪笑騎驢老潘閬却要三峯在眼中
次韻楊時可戲高潛翁

青衫白馬佳公子山東豪俊知名氏平生青雲期自至

倉庾一官聊復爾丞公家風繼伯起笑渠颺糠兩眼眯
乘田委吏古不耻端恐前言戲之耳

送僧之石梁

萬卉流芳不知春力巖畔澗下感紅皺碧乘興復誰同
蹤遠讎敵君不見五百聖者道雄機靈峰晦育深無極
寒山老寒山老隨沉迹迢迢此去須尋覓花落花開獨
望時記取白雲抱幽石

江邊行

江邊煮鹽女日艱沙中土聞道潮乾土有花肩負爭先
汗如雨經年鬻鹽赴官市屋裏藜羹淡如水誰家滋味
盡八珍猫狗食餘隨帚塵

和長門怨

長門沉沉人悄悄滿庭紅葉驚秋早窻底銀缸祇自明
却聞別院按歌聲飛花滿地君恩去覆水返瓶君或悟
人生離合自有時多應不在相如賦

調同舍

播穀子播穀子爾休苦苦催春耕勸農使者無一語嗟
爾聒聒知誰聽提葫蘆提葫蘆荒年有酒無人酤先生
年來一不飲花前愧爾情渠渠杜鵑流血思歸去百舌
從來巧言語紛紛隨意作春聲夢入鈞天聽韶濩先生
避俗厭煩喧竹底誅茆常閉戶蒼苔滿徑人迹稀嗟子
胡為肯同住聲名盡道男子事窓下誰知讀書苦燈花
落也作罷休早取商量君聽取

故人惠馬生筆

聞說江南多筆工馬生所作尤瓌異十年江海得妙旨
一日聲名傾衆技故人憐我有書癖數管不辭千里寄
齊鋒出穎雖不殊灑墨虛心皆已智當年退之傳毛穎
假辭託說終傷偽我今草草又百載矯首相望空兩地
文房四子迭有無商沒參橫似相避鼠鬚栗尾乃見嫌
強欲用之隨棄置馬筆端如故人面眼瞥見時心已記
跳龍臥虎非世習縮蛇縈蚓皆兒戲豈知遠適在加鞭
却傲良工先利器何當拂衣隱林麓約史著書從素志

敢言名姓垂竹帛自甘生死惟文字敬謝故人因及馬
梳毫截管惟精緻而今勁健已不售要須軟熟隨人意
靜堂為弼上人題

浮屠西來如轉郵方袍紛紛劇東甌上人維弼志獨憂
脩然高舉異凡儔從師度淮沂隋溝神都歲月俄十周
燕坐縹緲雲中樓明窻翰墨冰繭柔貴人旁午擁軒駟
問汝亦有所欲不此身南北真浮浮黃金白璧誰能收
乃獨汲汲從英遊乞書覽字無時休千年金石窮雕鏤

上劇鍾王下虞歐糝糊墨本如山邱精神散漫不可求
俗人貴耳賤兩眸今人古意豈不侔森然玉筋垂銀鈎
怒猊渴驥蟠靈湫錦囊象軸光油油自笑長物猶見留
幡然忽憶江湖秋瓶錫東下如輕鷗誅茆伐木寒巖陬
名堂以靜盖有由坐觀蠢蠢遍九州長空浮雲水中漚
眼前何曾無應酬嵐光波影相夷猶別來書札屢相投
問我何時泛扁舟西峯玉泉深且幽杖藜來往亦風流
紅塵道路方悠悠回首東南天盡頭

渡淮

我觀淮之源東行千里扁舟一日下長淮似與故人相
見喜不知渡越幾澗谷清澈尚爾無泥滓澹然端肯與
我俱試問故人能有幾蕩雲沃日窮眼界茫茫直與天
相似萬艘絡繹鼓風蒲翳翳塵飛明鏡裏况聞水伯時
惡劇雷擊風掀浪山起豈知生處極幽深清淺湏湏一
泓爾吾聞古來養心者擴而充之亦如此自慚學問太
迂疎十載不離蛙井底潢汙斷港何足道所得未能充
口耳忽驚浩浩東傾海會令百川皆遠指君看厚地一
撮土本來也是無多子人間萬事須自強嗟我蹉跎今
老矣

和左與言謝寄酒

君不見梅子真當年狂歌吳市門神仙隱逸兩何有耿
介感激空千言我今幸生太平日千載相望同祿秩間
省世事渾不知一心祇願饑腸實有誰解與魯公米無
田也釀淵明秣甕間細酌新潑醅既醉歡娛亦蕭瑟江

湖誰肯便相望一尊猶及詩人嘗榴花竹葉應撥去落
殘且看鵝兒黃高齋肆筵盡嘉客長鯨一吸無餘瀝座
上杯盤未狼藉愁見長瓶卧東壁新詩飄飄寫冑臆青
天白日飛霹休言李杜門限窄到底輸我巧鑽刺我詩
杉鷄竹兔耳未見虎狼先辟易異時更敢說較量縮手
從今作降敵

謝韓用可和記夢詩

嘗聞歐陽子自許一世豪及得梅老蟠桃詩畏彼松栢

臨蓬蒿歛然欲以怪自戲新句遠繼愈與郊嗟我後來
亦何為敬誦遺墨徒嘈嘈有時援筆學模寫矯首但覺
嵩衡高宣城無人頽尾空百年風月何寥寥那知吏部
有孫子年少力學精風騷前日記夢屬我韻筆墨奔放
欲與二子爭秋毫秦盆楚筑未覺陋鏘然入耳驚咸韶
昔我一官向天台春風洞府生碧桃簡書坐束寸步不
能到落花流水空迢迢羨君幽夢得所適一飽便覺忘
葷臊要尋蘓后評濟漯豈學劉玩迷妖嬈百年擾擾一

夢耳更較長短論昏朝不如吟詩飲美酒從他世事如
牛毛

按田南鄉夜過翁嶺

斗祿折腰方自勉敢嘆塵沙長滿眼平田細路苦縈紆
盡日肩輿在香篆簿書告辦裁知返落日在山山路遠
荆榛蔽塞虎縱橫僮僕相呼無處遯山下人家早閉門
踈籬燈火自黃昏杯盤四座還相語猶有行人過別村

贈五台妙空師

山僧棲在山之巔胡為振錫來市廛且言自得相形術
願與多士談媼妍津塗窮通可逆數名分巨細潛開先
龐眉合享壽考福鼎角堪持丞弼權人生肖貌雖若爾
天理應效非皆然條侯餓死始難必裴度果相終何緣
身衢第以直道致吉祉多為陰功延操脩向善或向惡
感召凶吉如蹄筌子觀傳記考物理謂師語議非無傳
出言少偷信不免受玉苟墮知難全况乎素行未中積
敢以虛表要諸天富哉荀卿騁雄辯推本心術深磨研

九州功崇夏禹跡三面德至成湯偏仲尼何長子弓短
古今無害為聖賢林宗知人出明性清澈鑒裁猶澄淵
大端亦貴器與識規矩安可私方圓君平卜筮達至理
探索造化窮推遷與臣言忠子言孝利害之際尤拳拳古
人術學務原本寧將浮說相拘攣美師通論近名教為
師條列終吾篇

康師贈臣閣黎次韻

樂天西湖誇竹閣寂寞百年風隕籜師今燕坐最勝處
翛然日誦山中樂富貴易致間難得造物畀渠良不薄
老康遊戲作倡言使我怙悵心茫然

趙持志出先公文炳所藏蘆鴈

當年公子身通侯錦衣玉食天上游騎龍日日朝北斗
豈識萬里江湖秋但聞人說蘆葦傍枯荷翻倒風颼颼
四天黑雲雪欲落羣鴈上下聲啾啾坐嗟上界足官府十
年高閣空雙眸豈無詩句強模寫曉夢不到寒江頭何
人筆墨得能巧活脫所見來神州高堂素壁試披拂已

覺身在蘆花洲嗟嗟江海人兀兀一葉舟烟簑雨笠不
不自好風雪橫來翻百憂豈知公子曾未見縑素髣髴
千金酬人生萬事適意耳過眼起滅皆浮漚玉函置僻
誇謹密流落道路知誰收公子好畫豈云爾要使萬物
供冥搜至今好句在人口泰華突兀黃河流嗟我後來
亦作詩辭慳意鄙勞雕鏤願起公子已死中論詩觀畫
一洗千古愁

欽定四庫全書

橫塘集卷三

宋 許景衡 撰

五言律詩

張元光生日

濶步雲霄去當年屬意深感時雖白髮許國尚丹心顧
我無才思登門怯醉吟誰能將壽酒滿滿為公斟

寄欽師

亭障臨燕塞江山復楚鄉艱難悲客路宴坐憶禪房燒

盡蒲花燭清餘朽木香十年如夢覺兩鬢自蒼蒼
還自肅寧晚色可愛寄盧行之

送客關城外回鞭驛路長風烟無限好簿領底能忙平
野破寒木紅塵烘夕陽新詩巧模寫最憶幕中郎

信步

信步春風遠田家暮暎亂畦還有徑疎竹自成籬雞犬
皆豐歲漁樵獨此時年年看節物鬢髮欲絲垂

招隱堂

僧家樂幽獨世路自塵埃丈室何人到重門盡日開石
泓泉滴瀝竹徑月徘徊多謝相招意江湖歸去來

次韻彥崇遊三洞

兩溪尋勝處三洞得偕行澗外雲猶濕山深谷應聲留
連看龍躍來徃計牛鳴回首林間寺疎鐘報晚晴

送翁脩撰

天上曾三接人間第一流雲章頒召節錦里送行舟急
雨千山暮迴風五月秋紅旗猶可識賓吏滿江頭

節序重重過京華物物新安排黍生角粒點艾為神窮
術無來客他鄉有故人揮毫非楚些誰與弔靈均

九日

青女飛霜重黃花挹露鮮伊人今已矣節物獨依然撫事
真疑夢登高淚迸泉關河重回首烟草夕陽天

九日追懷叔父兄長登高

殊方復嘉節對酒重悲嗟逝水人何處荒籬菊自花南

樓秋色遠西嶺夕陽斜舊日登高處于今定幾家

送黃元賓還鄉

寄語黃夫子而今正好行麥秋最涼冷梅雨半陰晴客
路空形後鄉山獨眼明偏親應更喜少婦好家聲

送世厚還鄉

斷續黃梅雨清涼小麥秋謫官猶逆旅送汝上歸舟松
菊宜勤種簞瓢善自謀餘生須付託可但鹿門遊

過西岑泛湖而歸呈左經臣

留連不覺久蕭寺足清風短棹平湖裏孤城落照中朝
廷尚多難身世轉飄蓬安得言分散清尊豈易同

呈呂幾仲

曾作河陽客春來花滿城曉風吹玉勒殘月落金觥天
末傷離索京華忽會并琵琶雙鳳翅耳冷十年聲

別黃巖

問我黃山尉無才亦可知頻修謝罪啓祇作送人詩壠
畝豐登外山林寇盜衰曾無慰父老別後莫相思

奉酬胡文贈別

蹇淺時何取蹉跎歲又陰田園歸去計事業老來心好
句煩相屬離愁自不禁松江分手處烟水暮沉沉

春晚

行樂連三月漁樵亦醉吟桑麻須日力花絮識春深飄
泊驚時變文章信陸沉故園渺天末無限欲歸心

和經臣晚春

蝶散花猶在鷓藏柳已陰敢辭連日醉恐負惜春心金

縷休頻唱瑤牋正苦吟獨慙詩學淺三嘆豈知音

伯氏

伯氏古豪士何曾與俗同酒狂天地外詩句笑談中池
水添新綠林花看着舊紅向來多樂事天末任漂蓬

早渡浙江

官舟憐逐客鳴榔破驚湍霞氣橫江白秋風送曉寒平
往獨往願今日上恩寬漸近嚴家瀨擡頭覓釣竿

晚行

脉脉多愁思栖栖復晚行路回村更遠林邃客頻驚宿
鳥非無處歸雲自有情鄉關悵何許天際暮山橫

松門詩

竹輜兼程去松門百里餘荒林疑獸伏窮海異人居山
擁波濤急沙輕步履虛來因王事耳此外敢躊躇

送從姪邦直丞長溪

阮舍淹丞屬閩山得儁髦詩書能自立州縣豈徒勞迂
拙從吾老飛騰看爾曹祇應記岑寂尺素到江皋

示世隆

問訊吾家姪題詩寄此情
遺孤猶小在聰慧乞憐生
祖母今年老門風待汝成
須知踈懶叔早晚欲歸耕

吹臺

聞說吹臺上秋來鏤薜蘿
白雲長自在幽徑復誰過
天末空愁眼尊前且浩歌
山林與廊廟二者竟如何

種樹

幽谷青青樹移根倩爾栽
祇疑荆棘地不稱棟梁材
豈

為歲寒改稍看春色回
清陰惟海國回首思悠哉

大翻翁行簡挽詩

學舍賢師友年家老弟兄
分符湫淮楚頌蓋憶都城白
雪千篇在黃梁一夢驚
承家今有子未覺負平生

趙敦禮見招小飲投壺明日南去

瀟灑賢公子閒邀病客俱
青燈初照席彩箭已盈壺
隆凖真龍種清聲想鳳雛
扁舟明發處應記夢華胥

挽劉太君詩二首

婉婉宜家早孳孳執禮勤事姑俱白髮看子上青雲飛
旄隋河路新阡慎水濱哀榮兩殊絕州里未前聞
配德樂邱園承家屬後昆千鍾豈榮耀一笑為平反庭
樹悲風慘霜天落月昏斑衣已陳迹補衮看忠言

次經臣見寄之韻

名節來金闕扁舟望石門家山秋渺渺烟水暮昏昏竟
失臨分語徒傷遠別魂慇懃謝池月相對宿江村

次韻周共叔五首

問學探前聖聲名自妙年何疑待價玉却計買山錢北
極雲垂地西江水接天扁舟如有約吾亦賦歸田

黃卷開三館紅塵又幾年病多須藥物旅寓費囊錢舊
學寧無意思文祇任天軒軒千里鶴可但戲芝田

鄉國兵戈息仍聞大有年欲尋江上宅預辦酒家錢好
句煩招隱餘生且樂天向來真可笑舍已別耘田

賜環初就日弛擔又逾年老矣懷三徑歸歟有幾錢報
君慚犬馬戀闕望雲天但得鄰顏巷寧論負郭田

鄰並端如約道隨可判年稻梁當富歲魚蟹不論錢春
到花開處霜餘橘熟天清尊長嘯傲滄海半桑田

次韻王功遠見寄

烏府參風憲鯁生負德音投閒雖白首體國尚丹心天
上浮雲散江邊秋色深第知歌繫壤寧復賦愁霖

次韻陳仲山見寄

風雨江湖夢衣裳京洛塵人生皆物役海內豈無貧丈
室雖多病鄰翁或可親杖藜元有約會見往來頻

次韻似之運使奉呈左徑臣兄二首

江海閒來久篇章老更新蒿萊猶自飽天地豈吾貧舊
友今持節諸郎亦可人應憐未歸客白首尚紅塵
酒膽他年大詩名近世無山林多避寇里巷笑為儒老
去慵開眼秋來欲染鬚涼風千萬里的的為南圖

寄許樂清仲輔

入竹空陳迹經行憶歲除舊遊誰更在逸興近如何樹
密鶯聲遠江寒鴈影踈樓頭紅日晚徙倚獨躊躇

曾汝器既別奉寄

憶在西齋日斯文得細論別離空歲月飄泊任乾坤把

酒餘風味看雲各淚痕扁舟獨歸處烟水暮昏昏

余與汝器皆有

哭弟之戚

寄張德祥

細草碧侵池幽花亦滿枝羣生俱有德造物定誰私故
國春將暮他鄉日自遲論文一樽酒何路得追隨

寄竹閣臣師

鹿苑西湖上鳥臺北斗旁塵沙空自老雲外定相望林
麓餘秋色郊原半夕陽惟應閣前竹凜凜帶新霜

寄沈亨老

時在京師

京國三千里人來慰所思遙知為客好何似在家時春
日鸞凰去秋風鴻鴈悲衣裳慈母線亦恐汝歸遲

寄薛十七巨源

茅屋西山曲携書喜見過別離驚歲月淹泊奈時何末
俗皆浮誕斯文肯琢磨後生餘力在吾意已蹉跎

寄錢子勉
花縣逢迎日琴堂宴坐頻
簿書時有暇燈火夜相親
世系皆王澤官曹獨海濱
政成飛舄去念別一傷神

寄題張學士三徑堂二首

留侯有高致世業更誰傳
苔雪新開徑蓬瀛舊集仙
藜床蔭松桂蕙帳帶雲烟
擾擾爭毫末何人解樂全

我欲尋三徑長歌歸去來
未能似夫子還是走塵埃
彩筆臨流賦清樽對菊開
披榛徃來處東望思悠哉

縱目軒詩

真人已仙去釋子在高岑
暮色江山遠春風草木深
何人與題詠今我亦登臨
縱目皆云爾誰知有縱心

行役詩

行役無時節春來又幾時
柳條隨處處梅蘂亦枝枝
弱質曾無取斯文祇自宜
眼邊新物色駐馬暮江湄

石泉小軒

泉列碧巖腹茲焉復小渠
泓澄元有在漑濯乃其餘
孤

迹寄江海三年困簿書閒來俯清淺感歎獨踟躕

土山驛詩

在永靜軍界
時被檄濱川

渺渺指滄海行行過漢陵衣裳千里雪鞍馬九河冰寓
宿適有處悲歌自不勝平生少游語耿耿對寒燈

晚晴

南州苦旱濕梅熟復何如老夫厭巾屨穉子在泥塗新
月出天末微涼生雨餘陶公入州府此興與誰俱
天街經暑雨烏府絕塵氛躍馬人皆散新蟬我獨聞風
生初罷扇日轉漸無雲寄語同時客清涼尚可分

駐馬詩

駐馬長河曲穿林小徑斜猶能尋隱逸可是厭泥沙軒
冕雖無意田園尚有涯何時策筇竹隨意到山家

魚題

台奴初學語丹子已能行問叔今何處嗔翁太懶生會
令主門戶豈復意功名坐對江湖晚橫塘舟自橫

野外

野外連荒草樓頭正夕陽
凭欄空遠目何處是吾鄉
王粲從軍樂少陵羈旅傷
男兒知底事出處兩難忘

宿僧房

捕逐雖王事經行亦自強
艤舟當海島寓宿得僧房
絕境三山在清風一水長
此生空物役回首意茫茫

夜過杜家村

駐馬問村老却言行未遲
路雖十里遠月到四更時
我去良有役子眠寧負期
人生隨意好冷笑一題詩

送師顏致康深道入京

二子今西去贈言聊爾規
勉哉精素業行矣仕明時
破臘梅先藥含春柳欲絲
江邊人散後帆影漸參差

上章倅二首

海內名聞久江邊歲復暮
美才由世濟清節畏人知
郡國已無事朝廷方有為
會參鴻鴈序歸去鳳凰池
簿領勤官府聲名振士林
雖云心尚在自覺力難任
歲月淹多病江山入苦吟
高堂昔三嘆亦恐負知音

遠意誠難問狂歌自不禁
花光春灼灼月色夜沉沉
簡冊終何事江湖獨此心
野禽多意緒飛集近寒林

橫塘

好在橫塘水人今去幾年
秋光空到地霽色自連天
伐石圍高岸誅茅駕短椽
歸歎此心在何苦利名牽

節物詩

江水西風急江天作暝陰
鄉山猶在眼節物莫驚心
是

處皆秋獲誰家急暮砧
薄遊愧妻子飄蕩到而今

聞子瞻南遷

隴蜀崎嶇外華夷聞望中
黑頭方世用青眼忽途窮
遂作天涯客何如塞上翁
幽愁還有作笑殺贊皇公

賀人祖父生辰

青春嘉誕日八十渭川師
林下有真樂人間無愧辭
松稍看舞鶴荷葉隱巢龜
賴有榮孫子藍袍薦壽卮

贈吳子思

花縣初相見清樽日笑歌交情論厚薄客路自蹉跎歷
歷功名意駸駸歲月多豈知同夜宿還問命如何

贈姚儀甫

年少開千卷生涯祇一瓢聲名動場屋意氣在雲霄素
髮今垂領青衫尚折腰未應輕斗祿吏隱本逍遙

贈張承老

永裕躬神武開邊絕漢西雖云擁貔虎猶未斬鯨鯢吾
子名家後當年訓士齊天涯思往事回首祇悽悽

題壽聖院

古寺重門裏回廊一徑幽水聲長帶雨山色最宜秋寓
宿已多日題詩更少留此生隨利祿行路日悠悠

寄題葉希聖申申亭

燕處厭紛華穿林一徑斜層巖開水墨古木走龍蛇事
業雖無補田園尚有涯何時策筇竹隨意到山家

每向新亭去何曾問主人弟兄俱有好樽俎自相親棲
翼雲山晚飛花洞府春長愁醉歸處步步近紅塵

孫大夫絕塵亭詩

丈人樂高曠閱世等樊籠
池館重城外塵沙一笑空
紅渠新過雨修竹自生風
未必全違俗杯盤與客同

池上

十里西城去春風水拍堤
畫船簾幕動別殿箎絃齊
勿覺仙山遠相將醉路迷
紅塵競回首斜日杏花西

螢

不知何處出牢落水村邊
隱隱猶含雨飛飛欲近船
詩

書看老矣事業尚茫然
今夕知何夕蓬窓猶未眠

去國

詩書元有志耕養苦無田
去國何為者題詩獨慨然
廟堂脩政事郡國奏豐年
五斗雖云薄餘生得醉眠

升之兄見訪竹閣

飛蓋山城外尋幽鹿苑中
層軒不受暑脩竹自生風
江海多年別杯盤一笑同
平湖春晚照歸棹惜匆匆

寄題會文閣

劉子天台去君今幾代孫山居多水石客至亦琴樽簿
領嗟淹泊詩書失討論何當謝羈束杖策過層軒

亞叟惠臘粥次韻

飛瑄迎長後香糜入臘新交情最憐客節物獨驚人雲
意安排雪梅香告報春病中踈酒棧兀坐惜芳辰

再和

河南聞譽久漢上定交新遺粥聊容俗題詩更可人歸
期恨不早旅思怯逢春他日從誰餉長懷臘八辰

邱隱夫傳神

曹霸逢佳士慇懃為寫真今君仍妙筆顧我獨何人軒
冕曾無意功名敢問津會須添杖屨却作自由身

挽左司江公

前輩風流遠惟公尚復存此心無限量所得有淵源眷
獎深宸宸聲名重諫垣平生經世志已矣復何言
壯歲從澹泊猶餘味道心今朝嘆流落羈旅老侵尋庾
嶺暮雲合釣臺秋水深向來遊歷處千載只如今

憲府叨新渥京華會卜居迂踈慙瑣瑣許與獨渠渠
唱看貴墨漂零送轎車他年桐水上雪涕更躊躇

樓朝議挽辭

金閨早通籍銀兔屢分符文采傾簪笏謳謠足袴襦
榮看子舍從養亦神都八十終天祿朋儕更有魚
東南獨耆德湖海老門生未厭遺簪舊頻煩倒屣迎音
容忽冥漠歲月又崢嶸夢入鄞江路依稀晚柝聲

送吳師常

吳君久羈旅所至即為家傾倒賢人酒浮游仙客槎
此身惟願健萬事儘從他聞說今歸矣田園亦有涯

送蕭德宏

孤嶼何時別雙溪累月留父兄安契濶庠序得優游
宿霧散初日春風乘去舟好看清汴水渺渺帶伊流

送李季成

花入新年好傳觴日倚欄故人從此別春色更誰看
灑落餘篇翰芬芳識蕙蘭片帆天際晚回首獨江干

送李忠彥

留滯嗟為客而今始據鞍梅花春信早星斗夜堂寒此
別十分飲何時一笑歡勞生強半在見晚不須歎

送德祥四首

借杜子美首句

天上張公子河間善最多三年種桃李萬室自絃歌北

關今歸去斯民奈別何會將清禁月千里照嘉禾

縣之西堂

天上張公子同時桂籍人江湖嗟迹遠關塞獨情親鴻

鵠寧無志驂駟已絕塵音書憐舊好別後莫辭頻

好去張公子依然別後深霜清風撼撼野曠馬駸駸奕

世皆榮問連枝復好音青雲多意緒寧復故人心

好去張公子離歌盡一尊朝廷方北顧父老惜南轅御

侮從先志招携亦舊恩須君對宣室為我折羣言

挽元僧正

物外孤高人間九十春朋遊多有道學子略成塵仙
嶺浮雲散寒潭夜月新孤生長感愴先友更何人

景城雜詩六首

井邑遺孤壘漁樵尚幾家
洪河散陵谷古塚入桑麻
燕
子初經節蜂兒幾報衙
此生天地內隨處是生涯

故國豈不好卑官良為貧
驅馳萬里去憔悴九河濱
亂水纔通野幽花已繡
春天公渾不惜乞與作詩人

藜藿晨昏外詩書寤寐間
百年皆物役五斗愧身閒
暖日花爭發春風鴈欲還
杖藜俯清淺蕭颯鬢毛斑

誰道邊城遠春風也自來
啞啞林鳥轉細碎野花開
日
歷初晨霧龍驚昨夜雷
郊原閒駐馬極目絕纖埃

燕趙當南北關河獨鬱鬱
盤時平無戾氣歲閏有春寒
仰

祿家千里題詩思萬端
危樓多晚照倚徧小欄干

冰雪初消凍關河已見春
民居樂豐歲吏隱是閒人
黃
水魚偏美青帘酒亦醇
吾生如有計五斗未為貧

任夫人挽詞 宋國 保母

榮養方南國安輿更北轅
從容對孫子聞問及平反
無
復承顏樂猶餘在耳言
會看墳上柏千尺倚高原

寄兄長

江上分携日樽前聽我歌安居是非少游宦別離多陋
巷從顏子斯文續孟軻平生端有意嘆息自蹉跎

寄三十九兄

伊昔初分袂于今幾度秋鷓行慙北闕鴈序憶南洲
湖海誰招隱塵沙獨倦游平生一樽酒好在謝公樓

次韻兄長見示二首

拜命辭南國携孥客上京塵沙驚老眼江海夢歸程醜
酒誰思我看雲賴有兄遙知倚欄嘯天濶暮潮平

此境本無塵端居更可人林園稍成趣風月轉相親暇
日已卜築他年待乞身絕勝貪夢好臨老種松筠

翁老過邑

百里絃歌地別來俄至今江山已陳迹桃李漫餘陰白
髮心猶壯清歌酒屢斟何妨鎮還徃眷眷吏民心

酬盧行之

綠分冰片碎金拂柳絲長臘雪猶含凍春風何太忙會
看鷺出谷不羨鴈隨陽誰憶江梅發風流八米郎

次陳留
短褐驅羸馬依然寒氣侵
春風官柳細紅日雪泥深
藹藹多佳氣飛飛亦好音
寧辭去家遠魏闕舊馳心

歎某大理墳
丹筆持平久清時屬望深
誰憐一坏土長負百年心
舊友多高誼諸郎亦好音
獨慚門下客流落但悲吟

姨母薛夫人挽詞

不獨相君子仍聞教子功
安輿四方外色養百年終
隴

畝惟先樹江湖獨轉蓬
凋零驚母黨涕淚落秋風

趙表姪出先德彥章詩卷

晚路嗟流落長時任鬱陶
故人今地下新句出兒曹
野潤春風早霜清夜月高
杯盤舊行樂江水日滔滔

和陳澤民見寄

涉世真堪笑論交愧未忘
先生已高遁賤子尚他鄉
簿領三年夢塵沙兩鬢霜
扁舟歸未得春水滿橫塘

逗曉

卷三
豆曉復籃輿平田細路迂村墟元閒寂籬落更蕭疎吠
大行隨客癡童喚覩渠從來喜淳朴况復野人居

江濶渾無際潮平更不流魚龍方鼓躍鳧鴨共沉浮別
岸多雲樹斜陽一釣舟蓬萊如可到當與子同遊

和左經臣移居

暑徃衣仍葛秋來甌尚塵北宮尤養勇東郭故安貧去
國經時久臨江卜築新未能供祿米愧爾少陵人

五言排律

王義夫召飯鰲山亭詩

海上聞三島人間占幾州孤城臨鳥道雄構壓鰲頭縹
緗層軒外縈紆一徑幽鳴琴常有暇飛蓋許同遊平野
連天闊洪河遶塞流清風驅酷暑畏日得新秋麥破銀
絲淨茶烹玉藥浮官聯慙蹇淺恩紀獨綢繆牢落登高
賦驅馳為食謀從公時晤語不復歎淹留

東坡詩寄劉元禮

東郡趨鋒召西廡振羽儀微言元自得夫子更誰師文
 物今為盛賢能衆不遺秋風看鷓鴣碧海盡蛟螭妙選
 追前輩高標照一時綵衣供戲樂絳帳欲歸遲念昔羣
 居盛論文非我私艱難良自信出處不無疑騏驥方千
 里鷓鴣但一枝田園日牢落浩蕩故山期

欽定四庫全書

橫塘集卷四

宋 許景衡 撰

七言律詩

平沙閣呈陳古田

畫棟朱欄壓水涯稍看劔石欲平沙虹梁突兀幾千尺
 雲屋峻嶒一萬家衮公侯應日起紛紛桃李競春華雙
 鳧自合朝天去饒與銀河八月槎

送童公權入洛

蹉過名園百五期眼前穀雨未為遲
好麾席上鐵如意拚醉花前金屈卮
塵土毋辭久行後簿書何計得追隨
河南耆老俱冥寞試問如今更有誰

獻王祠

有釣魚臺

列國提封倚樂亭九河分處見孤城
池臺釣罷人何在邱壠春來草自生
遺像丹青皆舊物斯民簫鼓漫新聲
誰能特表平生事祝史從官得幣牲

寄新茶王聖時蒙示五詩

建溪初採雪芽香病客分來敢獨嘗
一盃聊為金粟供五篇不學玉川狂
風雷有信猶嫌晚草木無情也著忙
誰似山中老松栢不知人世有炎涼

贈夏倅

九華直上參雲漢秀氣由來出楮紳
聞道賢良歸盛族故應文彩繼前塵
春風醴酒年年好月色燈花處處新
他日傳柑向隻闕還思曾醉慎江濱

和左與言

貧病年來謝還往交親書問可相聞如何舊好懷天末
猶及新詩寄海濱吾子叔孫盡咸籍主人兄弟亦機雲
羣居猶有游從樂官况淒涼獨廣文

和酬張敏叔

東嘉七著琢紅玉北苑拊芽模紫金野人何知敢持餉
詩老發興為高吟松江尊鱸有家世吳宮風月無古今
飯稻煮茗窮勝覽紛紛市朝塵土深

再和張敏叔

留連五斗未投閑獨坐窮愁有萬般多謝題詩相慰藉
應憐涉世最艱難載聞諸老推工部何止神童說長官
我亦半生收好句夜光偏照篋中寒

再和敏叔二首

弱冠曾攀桂一枝半生為國理芬絲高吟直到古人處
勇退宜為世俗師杖履訪僧長過晚茶水留客固應遲
黃山遊舊今能幾詩社猶忻小子隨

固知島可是詩奴何況區區杜與吳舉世徒能循覆轍

先生今為翦繁蕪淵明松菊還堪賦白傅園池亦有圖
莫把五湖都占了也須留與故人俱

和董適道

十載江湖早得名未饒淮海獨孫登揮毫落紙才無敵
傾蓋論交喜不勝休問喧嘩多燕雀須知變化有鯢鵬
青雲步步前頭去却莫低飛似我能

和張子壽二首

紅紫紛紛閉畫妍遊蜂舞蝶亦翩翩一年純是愁閑事

三月過來幾醉眠生怕楊花飛似雪忽驚荷葉大如錢
詩人只解尋佳句分付春愁與少年

風雨朝來不甚顛殘花贏得更留連簾櫳寂寂鶯方乳
桑柘陰陰蚕欲眠老杜只將詩作伴孝先偏與睡相便
江湖瀲灩皆春水好在橫塘舊釣舡

改堊西山延仲主簿特賜慶什次韻

改卜西山痛更深新塋松柏未成林三牲不待平時養
再命何勝永慕心泉壤多應增喜氣隴雲還為結愁陰

褒稱童辱新詩句拜德渾如旱歲霖
三月十九日同亨仲按樂大晟

聞道鶯花滿上林尋芳誰更畏霖霖
鳴鳩乳燕春欲晚
去馬來牛泥自深出大星壇方肇祀
聯鑣樂府按新音
溶溶九陌昏流水撩動平生江海心
辰火舊無
祭今創舉

除夕別仲煥

並轡不嫌車馬塵肯教節物惱行人
殘年氣候消磨盡
來日風光陡覺新我已襄陽訪耆舊
君方郢國和陽春

雖然不作多時別懷古知誰意氣親

和唐知府宗博

學省當年假佩紳誰知家世有功臣
朝班長憶傾鵝鷺
海角俱欣識鳳麟坐撫斯民雖有道
細看此境本無塵
自憐馬老猶迷路邂逅何妨一問津

了無聲價繼三豪敢嘆崎嶇世路勞
綸閣文書慚潤色
琳宮香火想焄蒿鯢鵬變化誰能料
燕雀飛翻自不高
松竹雖無三徑在長歌歸去也如陶

再用前韻

得賢一語可書紳妙選由來屬世臣千里方能辨駑驥
四靈安可後龜麟共看再造恢王業肯使中原雜戰塵
聞有王都近消息眉間喜氣已津津

異禮多應得雋豪病夫深愧館人勞初欣秩秩陪賓席
却憶呦呦賦野蒿春草池塘還得句霜天雕鷲定飛高
也知野客多閒散丹竈松風獨訪陶

寄家兄

斗祿驅馳驚歲晚世途齟齬奈時何也知犬馬猶能養
自恨田園苦不多兒女近來渾長浪弟兄何事尚奔波
橫塘卜築今應好試為頻頻理釣蓑

會餘慶

山城動是三年別古寺今陪半日閒簿領嗟余多眊矚
道塗憐子亦間閑並遊天上皆英俊幾箇江邊肯往還
莫惜一尊相伴醉已將毛髮等邱山

休師惠詩次韻

也知才木可高岑肯負平生學古心王事曾無絲粟補
鬢毛已覺雪霜侵寓留古寺聊登覽喜有高僧與對吟
更憶仙山最深處巖前小雨弄晴陰

贈仁上人

飽聽長蘆江水聲歸看苔雪更分明故人應嘆遽如許
慈母翻愁太瘦生邂逅艤舟同一笑登臨懷古亦多情
髯張好句新拈得恰好而今送子行
敏叔有送僧云別後遙知倚門母老
來偏憶出家兒

宿靈峯贈總持大師

記得曾為林鳳客高僧住處最深幽幾千里外重携手
三十年間一轉頭霜葉乍驚風槭槭雲堂相對夜悠悠
去留聚散元無著白笑多情更刺舟

寄康師

好在仙巖康上人從來心事許誰親品題泉石詩無敵
吞吐烟霞筆有神聞道弟兄皆妙質要當談笑繼前塵
箇中况有東溪老行處何妨更問津

寄仙巖元上人

龍穴梅潭抱嶺斜
憶曾同試雨前茶
稍須林壑開雲葉
便情兒童汲井花
一別仙山空夢寐
五年邊塞走塵沙
會須覓片閒田地
鄰舍如儂有幾家

送持後遇越

永嘉竹閣談空相
自是僧中第一流
盡放衲僧來聽講
也容禪子不相謀
二林三峽曾經耳
萬壑千巖試舉頭
提取淨瓶涓滴許
有時散作五湖秋

總師邀入山

學道無成亦可憐
紛紛膏火自熬煎
似聞沽酒邀元亮
故敢移書問大顛
州縣徒勞輸此日
雲山高卧或他年
須知二老風流在
賞遍西枝月更圓

虞仲訪僧正見招
以詩屬亟歸不及往
依韻和報兼簡康休二上人

東溪自是老林師
干偈瀾翻獨此時
盡判百家無好句
故教二子亦能詩
逢迎蠟屐應班草
奔走芒屨愧采芝

多謝相招故人意更慚妙韻繼前思
余夫之辭出采之
題舒氏覽秀樓詩
遠屋青山羅髻鬟小樓幽勝可躋攀
不論空翠煙霏處
盡在軒窗几研間
眼淨更無黃土眯
身輕曾伴白雲閒
他年定作還鄉計
倘與親朋一扣關

戴夫人挽詞

詩書歷歷教鄉隣
甘旨熙熙八十春
盡道先生真孝子
故知賢行屬夫人
總惟一訣三年後
柏壠孤墳數尺新
翦絲種萱今已矣
多應處處有遺塵

傅夫人陳氏挽詞

婉婉名家早結禱
伯鸞初怪嫁時衣
半生已覺人間夢
九死猶知俗習非
日永春風漾蘋藻
夜寒霜月落庭闈
稽山會葬人歸後
千古蒼官守翠微

柯運判修試院

當年龍閣帥閩中
闈館興賢特地雄
還見芝蘭修世職
固知斧藻有家風
堂堂劔佩瞻遺像
袞袞簪紳出泮宮

勸學一門真盛事西州何獨美文翁

寄台守劉襄明都講二首

江入章安波浪寒仙山縹緲在江干
二千石是誰為守三十年前好長官
聞道漁樵安里社從教風月落杯盤
新詩別後知多少更借隣翁洗眼看
薰然和氣破春寒見說專城冠越干
訟牒不勞揮翰手歡謔好付採詩官
獨慙聖世人三黜誰怕仙山路九盤
但得白頭長健在莫辭青眼重相看

送連子友守淮安二首

古來江漢最風流何況分符得顯州
落日淮源香泛泛含春沁水綠悠悠
兩歧實有豐年瑞五袴行聞載路謳
大觀曾郵誰見憶蕭蕭華髮對滄洲
憶昨銀袍試廣庭桂科同日拜恩榮
幾千里外相逢處三十年間一夢驚
隼旂光華仍遠別豸冠流落獨含情
清淮東下饒雙鯉江海何妨數寄聲

送何亨老出守泰州

海陵人說毘陵好太守當年迥不羣
新命而今分竹去歡誥何似隔江聞
簿書幕下人誰任尊俎樓頭客自醺
千騎固應知體國古來畎畝不忘君

張敏叔守梓州

風月閑心自不閑詩家本領更多般
千篇要繼杜陵後萬里寧辭蜀道難
今日赤帷新刺史幾年錦帳舊郎官
莫嫌白首功名晚松栢從來耐歲寒

護國寺詩

未暇遠尋廬阜遊只消護國也深幽
種蓮惠遠誰還往得酒淵明自獻酬
惡句多慙君唱首高吟長許作遨頭
請看十八人同社盡是人間第一流
小詩聊記鳳凰遊髣髴東林水石幽
已愧高僧與摹刻更煩諸老數賡酬
簿書底事長遮眼林壑何人肯轉頭
會待從公白蓮社杖藜來往亦風流

次韻馮吉老

馬蹄長厭軟紅塵欲去虛名意亦欣
壯士寧為東閣客

故人休誦北山文到家留語應如鶴出岫無心恐似雲
我亦有田江海曲年來舍己為誰耘

次韻廬彥升

同場名輩敢爭鋒想見當年賦詠工
苒苒星霜今欲老拳拳畎畝獨懷忠
羊腸已失千重險鵬翼方看萬里風
應笑長安徒粟米不知鼯鼠枝將窮

次韻陳季修

綵衣初寄水邊村學子紛紛已滿門
聞道詩書多旨趣

固知師友有淵源聲名在子那能掩志業
如余豈足論應笑倦飛歸已晚結廬開徑近雲根

次韻經臣見贈

邊郵無故事喧爭惆悵中原失太平
天上風傷方鼓動人間草木已欣榮
共懷前日千齡遇誰使蒙塵萬里行
淚眼時時望滄海百川渺渺嚮東傾

遇敏叔次韻

花縣曾聯令宰裾神都今喜沒階趣
青雲羽翼首一鶚

秋水精神識二鷓歷覽何如少陵集新詩便是梓州圖
狂吟大膽誰知我敢向龍門將虎須是日見東川唱和景物皆少陵陳迹

和趙承之春日

土牛喚起打春人休向東郊更探春未說風光十分好
且看節物一番新田園自省非無意簿領誰知尚為貧
閑塞塵沙長滿眼橫塘冰破碧鱗鱗

寄內

離家不道多時別在路依驚兩月闌漫有傳筒將委曲

祇容書歷報平安文園雖得相從樂明月長思一處看
早晚征鞍過天姥寄聲草草具杯盤

橫山閣

一笑樓頭屬晚晴我曹此樂最難名玉樽浮蟻一樣白
青眼與山相對橫箇裏風流終古在世間榮利過雲輕
未應暮色催歸思天外娟娟新月生

趙虞仲過仙巖以詩見寄答之

十年歸夢在江湖今日南飛塞雁孤已覺登臨多感慨

固應吟咏轉荒蕪近聞仙嶺尋先友亦有詩筒及老夫
還許追隨白蓮社橫塘今已結茅廬借韻

焚香藍帳中酷似梅花

江南臘雪不到地六出枝頭也逼真萬里塞垣從簿領
五年驛使絕音塵誰知斗帳回殘夢却有廬煙作早春
草木無情聊假合謝他知有箇中人

次韻戴禹功父子遊靈隱

聞道飛來太怪生薄遊聊與問山名陀羅布影於中好

篤耨飄香分外清猿在僧呼雖舊事鶴鳴子和亦真情

晚來歸路還瀟洒裊裊青煙十里城

伽陀羅木間有至中國者

再和戴堯卿遊靈隱

雲房相與話浮生此樂須知未易名釋子命題良有自
老人琢句得能清倚天樓殿三吳勝落日湖山萬古情
詩社若容追故事未饒五字有長城

甲辰春作

香火祠庭即隱淪誰知未許作閒人一拋夜雨橫塘宿

三見東風石液春當寧照臨齊日月餘生報効絕涓塵
尚寬九死憐多病乞與江湖自在身

和胡繼道傷春

遊車轆轤不停輪紅日遲遲展得春莫問年光催老速
且看風月逐時新田園未信無來客雲水從今願卜隣
預想漁村往還處野航何止兩三人

上時相壽五首

閒看暖律幾時回已覺陰雲四面開萬物定知春色近

三台今引歲星來競拈彩筆題詩句端為蒼生祝壽杯
師保從來周召事直須兩兩位公槐

年年燕喜倍光榮蘭玉稱觴滿相庭信宿尚餘元夜月
上台却是老人星包荒度量俾河嶽蓋世功名在典刑
一語堪為我公壽聖賢相與合千齡

清淨端為物外仙經綸猶有世間緣坐令四海渾無事
付與羣生大有年南極老人今日見西樓明月夜來圓
吾君萬壽公同德綠髮朱顏照冕蟬

槐庭三入妙經綸百度分明又一新上欲無為成至治
天教難老為斯民川塗蕩蕩初消凍草木欣欣各自春
誰信塵埃尚羈旅四年企首望洪鈞

上帝分明憫下民挺生賢傑在斯辰蓮花葉上青鬢老
萱草堂前艷藥春盡閱播紳歸藻鑑頻教動植入陶鈞
古來多少調羹手獨見緇衣有世臣

寄敏叔寺簿詩

海角紛紜祗簿書竭來不覺一年餘自覺擾擾無休息

猶及匆匆問起居前日先生官獨冷而今主簿意何如

應憐小女猶虞在只喜腰間已佩魚

敏叔時為太常簿新改服色

賀生日詩

慶系來從沁水園勲門婦德衆稱難舊聞孟母無欺語
新得嫦娥不老丹行見綠衣添袞繡更饒文砌擁芝蘭
却須剝種黃金菊留待年年獻壽看

德起惠酒

橫塘今作小塘居齋几蕭然一卷書心事蹉跎嗟足矣

天涯流落念歸歟尚煩親好頻携酒多謝園人日餉蔬
此境從來無遠近祇應在處是吾廬

常尉畫孫倅寶冠山圖

問著蠟屐到何處直在寶冠山上頭碧澗坐來元洒落
彩毫畫得便風流公方得志人間世我亦長思物外遊
一幅須尋好東絹閒人亭畔倩常侯

送仲煥入穎詩

好箇石城無分到問君此去意如何一江春水竹葉酒

萬點青山佛髻螺聞道楚宮俱泯滅祇應郢邑亦疑訛
直須索酒圖經看莫只聽他白雪歌

送西京宗博林茂南赴烏程

才名自昔等三張閱駿無人似九方金谷園中辭綺席
水晶宮裏奏清商割鷄正好師言偃歌鳳多應笑楚狂
未信江湖留得住凌雲頭角老昂藏

敏叔浮梁詩有放教明月上扁舟之句因成小

詩

幾年浪作紅塵客明月扁舟不自隨
忽得浮梁好詩句却思望柱舊家時
煙蓑雨笠多應在利徑名場兩不知
會有功成身退日不煩猿鶴怨歸遲

望柱在橫塘之側亦地名也

與言叙己邗之別

放逐歸來梅子真江邊無限送行人
千鍾桑落開新釀十里梅花正早春
邂逅喜君方筮仕經過嗟我倍思親
驚回十二年前夢陳迹依然淚滿巾

兄長省試下第還鄉以不及顧村景衡於此情

見於詩謹次韻

江邊送我赴瀛洲風物蕭蕭又見秋
百歲能禁幾回別此生已是十年愁
塞鴻自覺東南遠汴水誰教日夜流
淚濕西風知有寄塵沙漠漠漫回頭

送剛巽還鄉

問君謁告還鄉曲來往塗程得幾時
莫怪杯盤能草草只緣行李弗遲遲
路從鴈蕩靈山好秋入領原草樹衰
京國艱難同旅食而今莫遣老人知

剛巽舊與兄包蒙同在京師今剛巽

歸為其
墓耳

次韻戴禹功遊淨梵退居

泮宮人物最清修杖履時尋水石幽已聽老僧談出處
更邀逐客共賡酬浮雲過眼空千古巨浸觀身祇一漚
風彼舞雩宜有得聖門更欲與公遊

天寧節上壽紫宸退詣相國寺祝壽宴尚書省

霜天宮闕九門開共獻君王萬壽杯善祝歛來傾寶剎
賜筵還許燕中臺樂連百戲鴛鴦集花覆千官錦繡堆

說與伶倫逢此日年年長賦醉蓬萊

和陳文仲嘲夢

文仲已罷科舉
忽夢預秋薦

天公真箇解撩人不獨虛名老措紳聞道高眠閒白日
也教幽夢落紅塵此生出處原無意平日文章漫有神
百歲都來如一覺却須嘲取自由身

乙巳八月二十九日宿內府夢過村落循溪而
行問路旁人家此云何曰士村也涉溪入山崦
謂同行曰此可賦詩因得鴛燕二句既覺足之

以為異日之觀

杖策徐行山水間天然新句得非難鳴鳩報雨天欲曉
紫燕哺雛春尚寒物外勝遊方自適枕邊幽夢忽驚殘
士村他日尋陳迹却記曾為內府官

紀夢詩郭荀卿見和次韻

溪水冷冷溪上軒登臨誰道四并難當年髣髴夢仙塢
今日分明在廣寒還憶鳩鳴雲色重似聞雞唱漏聲殘
刻舟已有新詩句流落何妨作外官

秋冬思家

鈎簾危坐思悠悠踈雨知人特地收明月清風孤館夜
寒砧短笛異鄉秋我生志氣誰相許何日身心得自由
極目長天山隔斷吾家不見白雲浮

欽定四庫全書

橫塘集卷五

七言律詩

送李仔主木場寨

塞垣人物豈尋常推擇而今屬廟堂
 戚里從來有名將家聲當復振
 諸郎古陂解凍千頃碧官柳驚春一拂黃
 下馬也知無箇事蓼花詩興自難忘

次韻曾光叔曇縣尉

我今自笑箇生庵才讀君詩舌本甘未暇清修齊臘八要
陪游冶趁春三光叔有春風浩蕩約極知世外交從好却厭塵中
富貴耐谿老絕無名利念不謀耕鑿即漁蠶

次韻張縣丞賀三貢士

貢籍初登郡學生海隅草木已欣榮一鄉三秀真希闊
大筆千言豈猥并樂育從來推絳帳作新何止換丹楹
會看騰躍如夫子淡墨高高揭姓名

世綵堂

萊子斑衣祇一身未如今日劔溪濱一門純孝非無種
百歲高堂更有人饒得雲孫千指盛知他間世幾番新
太平佳話君休惜洗我從來兩耳塵

寄陳仲山

當年抱疾題新句老歲支離已可嗟官學半生渾似旁
塵埃兩眼漸生花相從杖履非無意歸去田園亦有涯
祇許刁圭振瘦茶與公白首醉流霞

勞勞苒苒任年華何用逢春苦嘆嗟但得千鍾傾竹葉

不妨一笑為桃花麒麟莫問行天路魚蟹從今飽海涯
祇恐愛閒成痼疾却須妙手泛丹霞

昏昏煙土客京華節物驚心祇自嗟一飽徒餐太倉粟
十年不見故園花躬耕舒嘯今方決卜築橫塘尚未涯
夫子元無療飢藥待從方士飯朝霞

寄張敏叔

壽春太守紫髯翁憶得當年笑語同應為江山盡詩助
更無音信問途窮簿書覩著矜齋靜棊局拈耒蠟炬紅
也待去為樽俎客却憐身世尚漂蓬

寄吳行可

憶昨揚旌過水濱一樽燈火夜相親邊城喜有笑談頃
鄉路誰知夢寐頻山驛梅花初破臘池塘草色稍回春
新年持節經行處亦許孤燈續後塵

寄王經國

魯陪誕節祝堯年過眼星霜歲人遷誰信江湖間釣艇
却來霄漢聽鈞天錦筵樂事今何似蓬鬢蒼顏獨惘然

還戴賜花殘照裏九衢塵土醉搖鞭

寄文通

俗流指笑漫喧喧好古初心自惘然已分平生有書癖
况堪此日識碑顛萬全盡散英豪外千卷仍存六一編
洗眼何時拂塵篋待將點畫較精研

寄薛克勤

高才猶佐古諸侯樽俎時時好獻酬萬物也知皆有後
此身安得不言休烹鮮未覺民難治炊黍猶忻客少留

會看曲臺須舊德討論文物盡從周

寄敏叔

敏叔書云日與
張卿天覺唱和

匆匆候館陪歡笑別去而今又幾年冠蓋由來在天上
音書還肯寄江邊也知官長多詩句未省誰人與酒錢
近日頻頻看餘目諸公要路亦騰騫

寄吳鄞縣

吳郎人物最雍容不墜家聲浙水東輦寺昔曾酬雪唱
道山今獨倚秋風薄書人報三年滿樽俎何當一笑同

金定四庫全書
卷五
卷盡暮雲天更濶
放教醉眼送飛鴻

舊有詩寄左與言
兼呈劉元禮
今因寓此仍用

前韻寄劉

東行長憶過新樓
衣綵題詩贈李舟
十里尚歌公惠政
十年誰念我重遊
雨餘三洞雲俱散
水落雙溪月自留
莫戀城南好泉石
斯民屬意富民侯

左崇見寄以鄭虔張籍見况

憶向栖霞宮裏宿
論文獨喜子相遇
酒酣尚覺初心在
歲晚其如別思何
官比廣文還較冷
詩疑司業不爭多
友生許予嘗如此
更問旁人果似麼

寄左經臣

二年南邑好相看
誰道忘形最較難
別去光陰驚倏忽
春來書信喜平安
如何柳市多時住
不向橫塘一笑歡
節物慳人詩興懶
多應閒處凭欄干

依虞仲韻寄劉元禮

先友相從古所博
杖藜當日喜盤桓
雲泉何啻千年別

塵土長懷一笑懽但掃勞心身後事何須天地掌中觀
果客憐念如前約卜築從今始苟完

李彥益過景城以詩寄之

聞說安仁過東縣却撩梅福欲歸心畫船長是半日到
秋水而今幾尺深人散渡頭飛鷺下月明波底老龍吟
一杯相屬知何日驛路蟬聲急暮林

次韻寄盧行之三首

萬疊遙山鎖暮煙一江秋水渺連天憑欄正是滕王處

下榻誰知孺子賢聞道白魚方切玉更饒黃雀正披綿
一樽吟嘯無餘事說著塵埃却可憐

莫厭喧嘩近市塵且欣空濶對江天揮毫曾不靳珠玉
列學何須問聖賢南浦西山雲漠漠夕陽芳草思繚繚
飛牋遠寄京塵裏多謝星軺尚見憐

撲撲金猊噓白煙峩峩畫閣插青天杯盤洒落有餘韻
翰墨風流追昔賢遠岫長堆翠羽被晚霞碎拍臙脂綿
銅章更有詩家子橫寫緒餘犹可憐

寄李聖與

李侯自是金閨客奔走人間三十年未信簿書能老我
何妨詩酒自陶然江山滿眼應相助風月關心最可憐
解道清波新過雨也教別乘過前篇

寄成正仲

畫繡初乘八月槎肯來一笑子真家狂吟取次還成軸
戲酌無多已過花陳迹悠悠驚夢寐勞生擾擾嘆長沙
遙知高會還思我共唱江天一抹霞

寄行之

城南城北長嫌遠卜得甘泉坊裏居笑語不愁歸去晚
往還可似向來疎二毛自覺身將老一別誰憐歲又除
定是烏銀正忙裏怪生沒箇寄來書

問訊盧家大小僧憶渠旅思為消凝春禽言語得能好
秋水精神更乞增今日垂髻且嬉戲他年鼓翼看飛騰
懸知父黨無能解頭白絲絲面有稜

寄仲山

欽定四庫全書
卷五
城郭長時厭還往却來郊外飽經過故人一別已多日
春色三分今幾何山鳥無端勸沽酒林鶯取次亦能歌
花邊欲作當年醉望斷東風十里坡

寄俞清老

寒棲巖谷古浮邱曾約同為汗漫游十載光陰如夢覺
半生簿領尚惝浮樓頭紅日半規晚眼裏青山萬點愁
淮水悠悠從此去試憑雙鯉到揚州

寄木尉君任

江湖萍梗漫流連邂逅天涯獨慨然老去鮑昭非俊逸
古來梅福是神仙一樽笑語渾如夢兩地音塵動隔年
有底樓臺堪寓目平蕪千里夕陽天

寄宋國寶

問君何日過留都想見初寒尚在塗塗一去塵埃事奔走
歸來門巷更荒蕪聲名盡欲傾時輩貧賤今方見丈夫
勉矣此生忠與孝扁舟未好問江湖

畫舫重過穀城圍撞著人人問子真聞道詩書元有意

欽定四庫全書
卷五
莫嫌州縣尚勞神一搏何日能如約五斗而今亦為貧
閑塞塵沙騎瘦馬故園花柳一番新

題葉家雙蓮亭

鴛鴦也是池中物何似芙蓉出水新獨蕊應慚今夜月
羣花空占別時春恭惟陶冶歸元聖聞道丹青憶老臣
更向東郊看合穎我曹今作太平人

代書寄福清王居士

前日匆匆問起居此心耿耿復何如身從驛騎三千
里人在天涯八十餘自是浮雲有南北誰知明月滿空
虛半生俯仰今塵土安得從容扣草廬

陳節秀才失目贈之兼簡卓羅源

何事詩翁遽失明朋遊相對淚縱橫祇應藥石犹能療
肯與風尤流便隔生老去篇章万得意春歸梅柳最閑情
風流密令雲孫在雪唱何妨屢寄聲

樂壽驛詩

富韓公使北
啟國書於此

迢迢古驛倚城隈使者當年幾往來慷慨誰無致君意

急難方見濟時才自知敵氣終須懾更覺天書不浪開
堂上遺塵何處去太平父老獨徘徊

和姪邦彥登道山亭詩

縹緲三山海山州登臨便覺壓鰲頭風雲出沒千尋塔
煙雨溟濛幾葉舟巍巍朱顏方照日蕭蕭霜髮獨驚秋
人間榮悴何須較且把吟牋敵酒籌

次韻黃堯翁南漪堂書事

南漪勝槩壓西湖珍重瀛洲肯寓居紅藕自欣歸賦詠
杜鵑應嘆早驅除煙收露下鳴皋鶴風定波平在藻魚
箇裏憑欄知有得絕勝閉戶病相如

敏叔除祠曹以詩二首寄之

掉却淮南好郡章欬然馳驛對天光有誰更草詩人詔
應教從前水部郎霄漢豈惟收舊物鬢毛每苦嘆新霜
十年尚有南昌客塵土昏昏只恁忙

趙子相逢閩塞間一聞消息破愁顏也知念舊心猶在
頗怪題詩寄尚慳已分低頭從簿領却因踈夢見江山

俱依風月應長好誰似先生耐得閒謂方彥德也俱依洞天在台州方居

送蒲秀才遊南劔兼簡上官守

十年萬事盡參差惟有騷人似有期山水窟中為俗吏
簿書堆裏得新詩從來好古幾成癖此去論文亦可知
安得相從飛兩槩看他郡國大生毫

送韓存中學士二首

郡國棠陰日日濃乘軺衣繡惜匆匆秋天鵬鷃風雲外
春草池塘夢寐中間道蓬瀛才有素肯教江海樂無窮
斯民未作北亭別使節時時過浙東

憶曾共飲楊雄宅屈指而今又幾年還喜名藩陪燕
俎剩看醉墨洒吟牋風煙幕幕留行旆鷗鷺翩翩近
畫船回首向來行樂處斷行跡雨濕江天

赤盞客館以清陂名堂賦詩

古渡誰教名赤盞新堂自是面清陂何人好事能題榜
今我居先為賦詩風靜波平人散後雲收天濶月明時

可憐此箇無窮意多少漁翁醉不知

清陂堂

當年平翠看青嶂

平翠在台
州黃巖

枕上長教捲畫簾今日清

陂堂裏宿寒波萬頃浸銀蟾人間好景無如此物外清
遊豈易兼富貴功名非我事尚容山水樂無厭

即事

關河念念問歸舟秣馬翻為楚國游野性從來迷出處
濁醪端欲慰沉浮春風庭院花千片暝色簾櫳月一鉤

看盡天邊歸雁過悲笳三疊下城樓

景城宛在水中央短棹飄然下渺茫早路常期泛滄海
異時誰復問瀟湘看他賈客千帆過聽盡漁翁一曲長
家在東南千萬里塞烟漠漠又斜陽

城外黃河四面流此中真箇是瀛洲雞豚散處看漁市
蘆葦叢中認馬頭子美淒涼聊遣興賈生卑濕不無憂
相過喜得田郎子時有新詩與唱酬

次韻邦直中秋夜月

秋半風高天四垂去年曾此賞清輝素娥可愛還依舊
遊子誰知尚未歸望極星辰皆北拱興來烏鵲自南飛
一聲水調何人唱莫惜淋浪酒濕衣

初至郡

流落翻為長樂翁也知天意憫人窮九仙巖洞寒林外
千寺樓臺落照中漸覺杯盤如里閤從教言語變兒童
郡人更說明年好綠葉垂垂荔子紅

蒲秀才集臨川詩

世人集句漫紛紛吾子超然有異聞猶把長矛探虎穴
不教仙翼浪鷄羣離離池上生春草藹藹江南欲暮雲
喜得安居從此始絕勝釐折事虛文

君子光惠牡丹

六年不見故國花每到花時只自嗟多謝故人分國豔
尚憐羈旅惜春華芳菲仙圃烘初日冷落書窓照暮霞
誰道無窮便無恨祇應也學我思家

越州孝女朱娥祠詩

十歲人家小女兒凜然高節見臨危委身甘死凶人手
轉眼猶懷大母慈天子早曾加寵賜邑官今為立新祠
若教娥與名俱沒畏敵忘親未可知

贈張同年諸孫詩

綠髮蒙茸初著巾翁翁喚作掌中珍始知詩禮趨庭早
又見芝蘭滿院春青紫近來如拾芥文章此去不勞神
塵埃衮衮元無補應笑年家老丈人

王經國生辰

試問何時得異材斗杓插子近旬來文星已作人間瑞
陽氣方從地底回何有摩挲話銅狄要看清淺半蓬萊
斯民再歲蒙休澤多少歡聲入壽杯

和張子壽晚春

東風作惡也輕仇斷送殘紅四散飄自是春愁渾未解
不堪詩句苦相撩冥濛薄霧迷歸燕料峭餘寒入做貂
齋閣但知拚一醉儘教窓雨夜蕭蕭

諸友偶賦克己以戰喻次韻酬之

聞道除戎戒不虞何須深考七家書萬全要在先謀帥
多算安能便勝予豈止邊陲卧輦鼓嘗聞俎豆薦牢蔬
古來偃武修文者會使人人有室廬

謝諸友

絕學寥寥千載餘忽驚酬唱祖前書善人今得見之矣
吾道將行命也歟滴滴寒聲消臘雪融融生意看春蔬
不才聖世甘無用歸去先人有敝廬

贈敏叔二首

星郎持節厭驅馳解組蕭然兩鬢絲三紀聲名詩獨步
五州惠愛更為師裕陵松柏秋風早茂苑江山落日遲
千載赤松應更喜故人孫子也相隨

公家舊物是尊鱸好箇歸休便入吳唯有五湖供放曠
也無三徑可荒蕪酒樽傾倒隨風月詩句流傳入畫圖
烟水悠悠來不盡高名千古與之俱

退食

退食尋常無箇事杖藜蕭散有餘歡小橋落日蓮風碧

別圃薰風荔子丹
早路謀身多齟齬
餘生隨意得盤桓
橫塘應笑歸來晚
短艇依然倚釣灘

贈俞清老

昔我江淮幾往還
聞君兄弟有聲名
小軒便作陶彭澤
五字何如李少卿
自說此身看老去
却漸相見太忙生
何時粗有田園計
把手江邊取次行

贈鄭介夫

人笑流離自把關
天教強健老林泉
回頭嶺海幾千里

屈指星霜五十年
無事一樽誰與醉
有時兩手自爭先

也知世上皆兒戲
出處如公豈偶然

鄭公自用兩手圍
碁左手勝則右手

把醜飲右手勝
則左手把醜飲

贈吳惇仁

長文
之孫

塵埃簿領判悠悠
瘦馬尋春到海頭
已是二毛侵老境
尚能一笑得英遊
誰言前輩風流盡
我覺名家世蒙優
但得此心常了了
豈知州縣是淹留

贈董公權

前輩風流今掃地怪君尚肯轉頭看元來自作小兒子
猶及當初老長官簡冊微言齊日月絃歌餘澤在芝蘭
却漸江海生尤晚不得同年拜杏壇

壁山堂

在處看山多間斷經行尤喜得斯堂畫屏簇簇連千室
古壁蒼蒼遶四旁憶昨服官叨內府祇供嚴祀屬新陽
天涯寓目徒增感一覺鈞天夢帝鄉

題竹閣

西岑僧舍知多少竹閣巍然鹿苑中蠟屐登臨非俗客
石床宴坐屬詩翁黃金堦砌紛紛月碧玉窓櫺細細風
千里江山應在眼狂鞭何用作深叢

又招虞仲來竹閣

一諾定須遊竹閣多時凝望出松臺祇應城市醺醺醉
肯為詩翁特特來湖水秋來清見底仙山雨後翠成堆
欄干供盡登臨目鷗鷺翩翩日幾回

寄張宰幾仲

往在橫塘詩酒社而今不忍重尋思時人狂簡無如我
縣尹風流更有誰塞上塵沙多冥冥江南梅柳正葳蕤
人生閒健須行樂莫學安仁鬢早衰

送高宰

長愛西湖無點塵樓臺倒影雜星辰未能把釣為閒客
且喜鳴琴有主人搖槳何妨長載月新隄最好是遊春
何須更說林間雉看取熙熙百里民

送李彥侯宰黃巖

委羽謂方彥德人物已先去陳迹風流猶至今
隱吏向來慚懶散令君此去好追尋
春歸山奧十里雪霜後園林三寸金
况有左生詩句好一尊端為伴高吟

自笑當初作底官只應山水得盤桓
江樓風月傳觴後邊塞塵沙行路難
閭里樵漁無失業歲時蕭鼓有餘歡
十年父老今何似為我從頭問訊看

題雁蕩山

別來常憶舊躋攀好信迢迢慰病顏
多按地圖傳藥石

不煩魂夢到仙山
塵沙猶在微茫處
雲水都歸指顧間
看取蕩中多少雁
祇應飛倦始知還

跋亨老所藏買田帖

世間榮利等雲浮
珍重先生早轉頭
要得良田供玉粒
何妨累紙洒銀鈎
千金身後方為貴
十襲公家得盡收
我亦塵埃伴遊者
紫藻二頃尚悠悠

送為章

使君遺愛在甘棠
故老于今尚未忘
椎鈍自嗟生太晚
風流猶及見諸郎
鳴琴暫肯留山縣
飛鳥還同指帝鄉
回前樓前江上月
夜來無故照離陽

送李彥禮

持節西陲已清切
還輿北道却盤桓
當官未覺家風遠
抗疏要令邊計寬
世俗多應笑公拙
我曹徒解嘆才難
但將名節為親壽
何止平反一笑歡

送廖用中

也知志業在詩書
可是才高與世踈
戲綵北遊非我計

督郵南去近吾廬官田雨足秋多黍城市潮來食有魚
更誦九江長短句人間樂事得如渠

送趙仲明二首

康州之
猶子

關塞相逢眼便青從容猶得問平生高談大抵多忠義
先世元來好弟兄但得朝廷收闕闕不論文武盡功名
河隄奔走非吾事去去神京信意行

役役都來幾獻酬生增別語攬離愁五更門吏開魚鑰
千里春風在馬頭若見遊從出京國為傳消息到真州

田園未有歸來計萍梗而今已倦遊

張敏叔時
守儀真

送商霖兼簡共叔

未學紛紛只自誇孔顏門戶本無遮農工商賈皆同氣
草木蟲魚是一家我欲收心求克己公知誠意在閑邪
汝南夫子規模大歸去相從海一涯

欽定四庫全書

橫塘集卷六

宋 許景衡 撰

五言絕句

宿崇國院

世塗足趨競野性惟閑散
卧聞風雨聲更覺江湖遠

再宿崇國院和前韻二首

能詩老工部好鍛狂中散
相望千載間未覺風流遠
群山盡龍蟠十駕客駑散
嗜酒愧陶潛過橋煩惠遠

題坡竹

勁節風霜日平生忠義心誰知身死後寸墨市千金

絕句

五載客河關塵沙滿領間扁舟下清阪眼底是淮山
笑語三關去扶持萬里歸情知是同載為底更霑衣

江樓

江水去無邊江樓思渺然西風掛帆席一是歸船

七言絕句

默室

寶冠題榜意已到竹閣作銘言豈多入室人人知是默
誰知个裏有傾河

送人遊天台

洞裏桃花無數開玉人不肯放春回未容梅福休官去
應怪劉郎獨自來

過寶勝哭雅師二首

鳳凰巖石最稜嶒十載重來強一登怪底巖前能寂寞

年來失却兩詩僧

雅與外師
為詩友

陳迹都來俯仰間
空堂遺像已爛斑
白雲誰道無情劇
猶向山前自生還

借蕪子美畫像呈趙君

鉄面蒼髯見舊詩
人間物色轉參差
君家好本煩相示
要識滄浪晚步時

過襄城三首

范忠宣
嘗為邑

公子言歸歲月深
絃歌猶自有遺音
誰云故國無喬木

看取青青著作林

父老分明識長官
青衫綠鬢照朱顏
故知廊廟經綸意
也似鳴琴百里間

聞道愛民如愛兒
從教閭里作兒嬉
紛紛行路皆垂白
知是當年不忍欺

題野鵲

羽物從來數易完
張生妙筆更多端
東山詩老今黃壤
野鵲寒林忍更看

題醒心亭

醒心亭下水悠悠歸棹匆匆更少留何日飄然五湖去
醉吟還得過浮邱

春日

春日尋春醉不醒而今春日若為情青絲織手成陳跡
舉案齊眉已隔生

梅

朔風吹雪滿長安閩越生來不識寒却有暗香飄六出

不須借與外人看

送筍與經臣

短短犀簪尚帶泥重重書卷已參差題詩分贈君應笑
何似東坡噴飯時

再次江左司韻四絕句

平生學道竟何如不覺垂垂兩鬢絲六義賴公多比興
一年猶足慰朝饑

春風吹面立多時此句誰知好色絲未許飲河同鼯鼠

只消翫味已忘饑
玉粉盛來祇小盤
仁人覽物不徒然
豈惟廩賜皆民力
牛磨團團轉幾千
土木形骸付等閒
祇應飲啜亦皆然
蒸來十裂已堪笑
何況長持飯幾千

還自樂壽寄盧行之三絕句

漲水經春處處通
悠悠雙槳夕陽中
誰教醉眼添詩思
不是松江萬頃紅

順水知人欲到家
扁舟拂地過天涯
寄聲幕下紅蓮客
穩放銀河八月槎

當年玉帳撫轅門
鼙鼓聲中十萬軍
妙畧未應隨手盡
諸郎才氣各凌雲

行之見和再寄

大手從容靜塞塵
人間猶誦病參軍
詩家態度公能繼
還見春空藹藹雲

寄陳季衍父子二絕

珠霞瑤花糝暮天亂侵酒殘酒吟牋須知望雪亭前客
不學袁安閉戶眠

郊原草木盡枯荻重霧陰雲掃不開騎馬擁袍何處好
梅花門外探春來

寄望回

塞上何時謝抱關優遊琴酒舊家山小橋小艇相過處
橫徑橫塘一水間

行之席上送忠彥

客裏相看常草草酒邊一笑莫匆匆明朝各自東西去
回首江山宿霧中

訪唐尉

郭外青山帶勢斜松篁深處子真家年來鉦鼓渾無事
卧看殘陽映落霞

酬戴禹功聞蛙三絕句

談經長下董生帷知有蛙鳴在曲池說似青衿來學者
莫因聒聒亂心思

春來蛙黽滿陂湖，勿為繁聲便疾渠。
萬物爾時均長養，酒灰未可信前書。
水畔螢飛雨過時，天涯逐客獨思歸。
慣聽相應昏昏月，好在橫塘舊釣磯。

亞叟惠龍腦菊二絕

州縣徒勞可自咍，便憐三徑老莓苔。
拂衣未作歸來計，且把黃花到處栽。

正色最宜霜後見，清香自是藥中珍。
明年把酒東籬下

采采何如舊主人

再和

節過霜風袞袞來，幽叢渾欲卧蒼苔。
故知短簿朝天去，更為淵明特地栽。

長笑麝臍難作敵，未饒沉水獨稱珍。
移根只好留閒處，不見紛紛藥市人。

贈別盧行之三絕

三載相從樂有餘，也知志業在詩書。
柳亭蘼甲分携後

更有何人得似渠

尋常送客一樽酒醉聽離歌亦慘顏今日匆匆折楊柳
高陽關裏唱陽關

百金買得玉麒麟千里看他氣欲奔知子猶能守家法
不應騎去傍人門

贈別應仲康功二絕

多謝故人憐逐客不辭追路到吳山誰知別意添悽斷
却送歸舟出北關

臘盡江梅未放春欲將何物贈情親
寄語吳門老丈人

蜡祭前一日致齋亭午風日和暖呈同舍二絕

明朝八蜡徧群神今日風光漸可人
分明臘盡已含春

午夢昏昏迎好夢齋芳寂寂稱幽人
解作霜臺一笑春

過靈臺阻雨不得遊張園二絕

雲瑣蘭皋十畝園
蒼官青士自簷門
何須風雨遮來客
應怕莓苔有屐痕

當年詩酒早盤桓
無教蕭蕭碧玉竿
雨籜風梢如好在
故應知我轉頭看

過強氏園詩

門外遊人撥不開
城陰小徑點莓苔
疎枝淡蘂深深處
只有春風自往來

過朝娘墓所

夢中眉目尚分明
一過空堂百感生
懷抱牽衣今已矣
春風渺渺暮潮平

題光武廟

聞道三千惟一心
未應百萬怕王尋
可憐千載興王地
城郭推頽樹草深

己卯元日持檄樂清界
上望雁蕩集句寄寧師
笑指蓬瀛第十洲
青山歷歷水悠悠
眼邊江舸何匆促
寸步教身不得遊

過天姥見敏叔留題

尊酒都門昔解携，繡衣持節大江西。
却尋十載經行地，半壁新詩手自題。

宿雲洞

巖壁經春長薜蘿，洞門亂石自嵯峨。
山僧祇愛雲長在，不道人間雨未多。

梨花

飛瓊端是張公女，獨對東風無一語。
粉淚盈盈春欲暮。

看盡天桃作紅雨

妙智院雜花盛開而邑中獨未

山城紅紫看猶蘂，野蝶遊蜂祇漫猜。
却是此中春較早，等閒行處亦花開。

試茶

此生貧與病相兼，從仕居閒兩不堪。
莫怪年來有茶癖，要看滋味在餘甘。

損軒詩

遷善宜將室欲參此軒名損亦何談古來種種無非學
更好從頭問老聃

泗州堂

投宿山堂第二回壁間題字已塵埃簿書奔走渾無定
更解偷閒幾度來

賈村三首

浩浩長河去不回先生風采亦悠哉
日暮牛羊自下來

蘆葦蕭疎倚斷垣賈家猶有兩三村
知是先生幾代孫

漲河秋水日渾渾獨放扁舟過賈村
初浮清汴出都門

環翠軒

橫塘歸路尚間關環翠軒中幾往還
不勞回首白雲間

好是清風五月寒便教忙殺也盤桓
最憐池水荷花滿

不與詩翁一處看

敏叔詩云來恨不逢池水滿屏風圍在芰荷香

題平翠軒

簾捲清霜曉尚寒
好峯重疊在闌干
登臨每恨青山遠
今日青山枕上看

道旁人家小軒

方沼圓荷十數箇
短牆新竹兩三竿
憑欄盡日猶無厭
却借行人一餉看

斗野亭

得得來尋斗野亭
亭今已作鎮官廳
壁間多少新詩句
見說當年聚德星

醉柳亭

憶在河間醉柳亭
十年南北嘆漂萍
舉頭河上如相識
多謝逢人眼更青

過西湖懷詹致一

憶昨藍輿出城郭
靈芝軒檻共徘徊
故人短棹今天末
斜日湖山我獨來

墜馬戲作

病軀自覺海天遙瘦馬誰教作意跳也是諸侯老賓客
不妨造物惡相撩

次韻張敏叔筠軒

蘭陵公子留題後青草閒花變四時惟有此君猶好在
年年添得歲寒枝

孔顏畫像

亭亭一氣自渾淪藹藹和風與慶雲畫手千年聊寫似

豈知天未喪斯文

寄邱覺時在天台

每欲扁舟老江海不堪五斗尚塵埃煩君且覓天台紙
待取橫塘居士來

招琴僧

客心日日是塵埃寄語家山好在哉流水松風無夢寐
誰能特地抱琴來

戲遠大師

廬阜遠公真好事白蓮社裏盡高才師令更不曾沽酒
底事淵明日日來

淨光是老几上見呂少逸詩軸二絕

白髮龐眉一老僧掃除緣事室如冰案頭惟有新詩軸
自說風流令尹能

天涯此日逢周子海內今年得呂侯自笑種頑終不比
可憐迂濶暗相投

羅源護國院危薄以為大類廬山因作兩絕句

石橋松徑入招提盡道分明是虎溪却恨歸鞍太匆促
不能月下聽猿啼

東林未到聞人說護國門前最逼真亦有遠公能好客
他年同作社中人

資福清軒

偶過清軒坐餉時道人煮茗索題詩紅塵六月門前路
踈雨泠泠滴小池

宿橫塘雨餘見螢感舊

一賦流螢二十年短蓬還是未能眠此生擾擾何為者
寄諸諸兒各勉旃

宿辯正

酒酣詩卷幾賡酬十載光陰一轉頭休聽空塔鳴夜雨
何郎雙鬢不禁秋

行之見招觀畫

喚我來看訪戴圖溪山滲淡雪模糊扁舟也待江湖去
更有王維妙手無

乙巳五月十八日沈元鼎招飯昭慶登白蓮望

湖樓汎舟過靈芝少憩孤山下七絕句

蓮社群公跡已陳壁間詩句尚清新湖山俛仰成今古
更好留題遺後人

樓前湖水與隄平湖山周遭翡翠屏從倚闌干聊寓目
知公教我醉時醒

藕花亂點水中天小雨輕陰淡暮山試倩舟師連蕩槳
要隨飛鷺過前灣

鳴琴餘暇即湖山飛鷁傳觴縹緲間只恐雙鳧朝帝所
不容長伴老人閒

幾年塵土客京華夢到西湖佛子家今日扁舟還似夢
不知流落在天涯

蘋末渾無向晚風湖光湛湛磨青銅平生個處要如許
塵垢從今一洗空

雨過孤峯濯翠鬟亭亭倒影夕陽間夷猶待看湖中月
可奈城門欲上關

經巨重九假馬同諸友登高

借馬登高日已曛一尊眊眊自相親可憐山奧無多地
著盡秋來沒興人

病告看看近兩旬登高一一聽諸鄰佩萸誰是佩刀者

落帽多應落解人

經臣秋試失利時余在告

墨牛圖

一牛動是萬錢值墨指一作何紛綸安得田家真有此
坐令四海無飢民

出處由來祇一塗區區分別欲何如試看信手作毛角
絕勝當年陶隱居

橫塘

春日橫塘綠渺漫扁舟欲去重盤桓誰教向晚廉纖雨
又作殘春料峭寒

次韻戴人連遊靈隱

春來幾度過靈山不覺穿林錦繡斑可是人間未炎熱
冷泉終日自潺潺

左經臣觀潮閣見招有祇把清風占得公之句

週遮豈得吾徒事省淨還為世俗嫌若把清風召人客
已應賽過水晶盤

次韻江左司

長空翳翳木落處流水渾渾沙盡頭安得此身生羽翼
眼中長見釣臺秋

次江文韻

釣瀨沉沉月一鉤魚龍夜夜盡回頭狂奴活計非公意

乞與江湖萬里秋

學道誰言百不憂
攔干盡日倚樓頭
須知橫雨千山暮
不比西風一葉秋

擾擾爭碁局與籌
也知一著在前頭
終朝下手渾無處
為底無人問奕秋

請公早早泛虛舟
多少行人在渡頭
看取清風起蘋末
片帆歛過五湖秋

平生有志慕前修
嘆息因循漸白頭
端向歲寒看松柏
始知凡木不禁秋

溫嶺界上

嶺北無端去抱關
嶺旁便是舊家山
回頭試覓歸時路
只在行人頃步間

剡溪橋

去去來來今幾秋
霜毛漸漸滿人頭
束書匣劍平生事
斜日江山獨倚樓

歸自濱州

扶踈弱柳綠初勻
啞吃黃鸝語未真
行路遊春渾不覺
却須說似探花人

馬首石詩

世俗亦知千里遠
却將凡馬被雕鞍
何人欲識真龍種
好向巖頭仔細看

和朱深明

曾陪杖屨古荊州
十載光陰一轉頭
擾擾紅塵長滿眼
峩峩三峴獨橫秋

當年一笑得英遊
共弔沉碑漢水頭
回首鹿門高遁去
人間姓字亦千秋

贈左司

先生見告漢江上
居士歸從庾嶺頭
白日火珠無玷翳
閒花野草是春秋

和經臣閣上思彥章

登賞猶訢詩友俱
不知趙子更來無
暮天好處須同賦
乞與人間作畫圖

和江左司

新夢紛紛落磴時
旋看片片作銀絲
先生自足醍醐味
惻隱猶憐穉子飢

西湖夜歸口占送李恭發

山上徜徉湖上歸
月明千頃侵玻璃
明朝有客朝天去
多少紅塵在馬蹄

戴浚秀才需堂

客到需堂日已曛
從容樽酒話情親
欲來却去知何事

笑殺當年妨戴人

清陂堂

簿領他年解印歸
尚憐江上子魚肥
扁舟不學鷓鴣子
只要清陂作釣磯

午枕歌時睡思遲
含風百頃碧琉璃
人生適意當如許
莫遣塵埃外客知

取次題詩留屋壁
從他傳唱落漁家
禪翁好事還堪笑
枉却青青一尺紗

過吳子厚和醜楊時可壁間新句

主人還往多佳客小閣遙迎不計時
蘸甲一盤梅福醉揮毫半壁子雲詩

題紫膏院壁

院有茶山

雪消谿谷已含春雷動槍旗一簇新
解道人間最仙景風流無復杜陵人

望湖樓示世厚

樓頭滿眼是湖山瑟瑟清風燕坐間
三伏長塗走塵土

他年記取此時間

寄盧中甫四首

霜風獵獵動旌旄月落天低錦帳高
旋放洮河三尺水洗磨十萬血腥刀

九月都門風薄衣夜砧聲裏雁南飛
野人不識長安樂且趁鱸魚一棹歸

朝來暮盪何日休塵埃滿面霜滿頭
草堂竹閣壓秋水幾時和月弄扁舟

制勝關頭雪未融
崆峒山下又春風
此身不及涇川水
漾絮飄花日向東

寄筆墨紙兄長絕句三首

最憐脩貢自峨岷
拜賜中天雨露新
好為先生載嘉句
却愁紙價湧京塵

潘生地下骨應朽
妙技猶藏天府中
刀筆未應當好賜
不如分付與詩翁

刑名去取漫怛怛
慚愧官家五色毫
老矣弟兄無用處

只應警銳屬兒曹

寸碧亭

此詩據東甌詩集增入

杖履尋常行樂處
不論小徑與幽亭
誰知蒼莽千峰外
尚有仙山一點青



